

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

यूहन्ना रचित सुसमाचार

मसीह क आउव

१ जब दुनिया क सुरूआत भइ, तब ओह समइ बचन *पहिलेन स रहा। उहइ बचन परमेस्सर क साथ रहा। उहइ बचन परमेस्सर रहा। २ उहइ बचन एकदम सुरूआत मँ परमेस्सर क साथ रहा। ३ समूची दुनिया क सब चीज उहइ स पइदा भइ। ओकरे बिना कउनो चीज बनाई नाहीं गइ। ४ उहइ बचन मँ जिन्नगी रही अउर उहइ जिन्नगी पूरी दुनिया क सब मनई क बारे ज्योति (गियान, भलाई) क नाई रहा। ५ ज्योति आँधियारे मँ चमकत ह अउर आँधियारा ओका जीत न पावा।

६ परमेस्सर क पठवा एक मनई आवा जेकर नाउँ यूहन्ना रहा। ७ उ एक साच्छी क नाई आवा जइसे कि उ सब मनई क ज्योति क बारे मँ अपने बचन मँ बताइ सकइ। अउर जउन उ बतावइ ओहमाँ सब मनई बिसवास कर सकइ। ८ उ खुदइ ज्योति नाहीं रहा मुला उ सब मनई क ज्योति क साच्छी देइ आइ रहा। ९ उ इ बतावइ आइ रहा कि इ ज्योति बिल्कुल सच्ची अहइ, अउर उ इ हर एक मनई क प्रकासित करी। उ इ बतावइ आइ रहा कि सच्चा ज्योति इ दुनिया मँ आवइवाला अहइ।

१० उ तउ इहइ दुनिया मँ रहा अउर इ दुनिया क उहइ पइदा किहेस मुला दुनिया ओका पहिचान नाहीं पाएस। ११ उ अपने संसार मँ आवा रहा, मुला ओकर आपन मनई ओका नाहीं अपनाएन। १२ मुला जउन मनई ओका अपनाइ लिहेन्ह, ओन सबका उ परमेस्सर संतान होइ क अधिकार दिहेस। १३ परमेस्सर क औलाद क नाई उ कुदरती तौर प न तउ लहू स पइदा भवा, न तउ कउनो तने क इच्छा स, अउर न तउ महतारी-बाप क योजना स। मुला उ परमेस्सर स पइदा भवा।

१४ उहइ बचन देह अपनाइ क हमरे सबके बीच मँ रहइ लाग। हम सब परमपिता क एकइ पूत क नाई ओकरी महिमा क दर्सन कीन्ह। उ बचन

अनुग्रह अउर सच्चाई स भरा रहा। १५ यूहन्ना ओकर साच्छी दिहेस अउर सबका सुनाइ क जोर स कहेस, “इ उहइ अहइ जेकरे बारे मँ मई बताए रहेउँ, उ जउन मोरे बाद आवइवाला अहइ, उ मोसे महान अहइ, मोसे आगे अहइ, एह बरे कि उ मोहँ स पहले मौजूद रहा।”

१६ ओकरी करूणा अउर सच्चाई क पूर्णता स हमका सबेन्क तमाम अनुग्रह पर अनुग्रह मिला। १७ हमका सबेन्क जउन व्यवस्था मिली अहइ, उ तउ मूसा क दीन्ह अहइ, मुला जउन अनुग्रह अउर सच्चाई इ दुनिया मँ अहइ, उ ईसू मसीह क दीन्ह अहइ। १८ परमेस्सर क कबहूँ कउनो आज तलक नाहीं देखे अहइ, मुला परमेस्सर क जउन एकइ पूत अहइ, अउर जउन हमेसा परमपिता क संग रहत ह, ओका हमरे सबके सामने परगट किहेस।

यूहन्ना क ईसू क बारे मँ साच्छी
(मत्ती ३ :१-१२ ; मरकुस १ :१-८ ;
लूका ३ :१-९, १५-१७)

१९ जब यरूसलेम क यहूदियन याजकन अउर लेवियन क यूहन्ना क पास इ पूछइ क बारे भेजेन्ह, “तू कउन अह्या ?” २० तउ उ इ साच्छी दिहेस अउर बिना कउनो हिचकिचाहट क इ मानेस, “मई मसीह न अहउँ।”

२१ तउ उ पचे यूहन्ना स पूछेन्ह, “तउ तू फिन कउन अह्या, का तू एलिय्याह अह्या ?”

यूहन्ना इ जवाब दिहेस, “नाहीं, मई उहइ न अहउँ।”

यहूदियन पूछेस, “तउ तू का कउनो नबी अह्या ?”

उ फिन इन्कार कइ दिहेस, “नाहीं।”

२२ फिन उ पचे ओसे पूछेन्ह, “तउ तू का अह्या ? हमका बतावा जइसे कि हम ओनका जवाब दइ देई, जे हमका पचेन्क हियाँ भेजेस ह ! तू अपने बारे मँ का कहत अहा ?”

२३ यूहन्ना कहेस:

“मई आवाज अहउँ जउन रेगिस्तान मँ पुकारत अहइ :

‘पर्भू क बरे सोझ सोझ रास्ता बनावा।’” †

*१ :१ बचन मूल मँ यूनानी भाखा बचन बाटइ। “लोगोस” जेकर अरथ अहइ संदेस। एकर अनुवाद “सुसमाचार” भी कीन्ह जाइ सकत ह। हिआँ एकर अरथ अहइ ईसू। ईसू एक ठु रास्ता बाटइ जेकरे जरिए खुद परमेस्सर आपन बारे मँ मनइयन क बताएस ह।

†१ :२० मसीह “अभिसेक कीन्ह गवा” (मसीह) या परमेस्सर स चुना भवा।

‡१ :२३ उद्धृत यसायाह ४० :३

२४ इन सबन क फरीसियन भेजे रहेन्ह। २५ उ लोग ओसे पूछेन, “जदि तू न तउ मसीह अह्या, न एलिय्याह अह्या, अउर न तउ नबी अह्या, फिन काहे बरे तू सब लोगन क बपतिस्मा देत अहा?”

२६ यूहन्ना ओन पचेन्क जवाब दिहेस, “मई ओन सबेन्ह का पानी स बपतिस्मा देत अहउँ। तोहरे सबन क बीच में एक ठु मनई अहइ, ओका तू पचे नाही जानत अहा। २७ उ मोरे बाद आवइवाला उहइ अहइ। मई तउ ओकरे पनहीं क फीता खोलइ लायक नाही अहउँ।”

२६ इ सब घटना यरदन क पार बैतनिय्याह में घटिन ह जहाँ प यूहन्ना बपतिस्मा देत रहा।

ईसू परमेस्सर क मेमना

२९ ओकरे दूसरे दिन यूहन्ना ईसू क अपने लगे आवत देखेस तउ कहेस, “परमेस्सर क मेमना क देखा जउन दुनिया क सब पाप हर लेत ह। ३० इ उहइ अहइ जेकरे बावत मई बताए रहेउँ, ‘एक मनई मोरे बाद आवइवाला अहइ, जउन मोसे भी महान अहइ, उ मोसे भी आगे अहइ, उ मोसे पहले स मौजूद रहा।’ ३१ पहले मई खुद ओका नाही जानत रहेउँ, मुला मई इही बरे बपतिस्मा देत चला आवत अहउँ, जइसे कि इस्राएल क सब मनई ओका जान लेइ।”

३२-३४ फिन यूहन्ना आपन इ साच्छी दिहेस, “मई देखेउँ कि कबुतरे की नाई सरग स नीचे उतरत आतिमा उहइ प आइके टिक गइ। मई खुदइ नाही जान पाएउँ, कि उ कौन रहा मुला जउन मोका पानी स बपतिस्मा देइ क बरे पठए रहा, उ मोसे कहेस, ‘तू आतिमा क उतरत अउर कउनो क ऊपर ठहरत देखव्या, इ उहइ मनई अहइ जउन पवित्र आतिमा स बपतिस्मा देत ह।’ मई ओका देखे अहउँ अउर मई साच्छी देत अहउँ कि उहइ परमेस्सर क पूत अहइ।”

ईसू क पहला चलन

३५ दूसरे दिन यूहन्ना अपने दुइ चलन क साथ फिन उहइ जगह प मौजूद रहा। ३६ जब ईसू क उ अपने पास देखेस तउ कहेस, “देखा! इ इहइ परमेस्सर क मेमना।”

३७ जब उ दुइनउँ चलन ओनका इ कहत सुनेन तउ उ दुइनउँ ईसू क पाछे चल पड़ेन्ह। ३८ ईसू ओन पचे क जबहि अपने पाछे आवत देखेस तउ ओसे पूछेस, “तोहका का चाही?”

उ पचे जवाब दिहेन, “रब्बी, तू कउन जगह प रहत ह?” (“रब्बी” अर्थात “गुरु”)

३९ ईसू ओनका जवाब दिहेस, “आवा अउर देखा।” ओकरे बाद उ दुइनउँ चलन ओनके पाछे चल दिहेन। उ पचे फिन ओकर रहइ क जगह देखेन। ओह दिन उ दुइनउँ चलन ओनके साथ ठहरेन्ह, काहेकि साँझ क करीब चार बज चुका रहा।

४० जउन दुइनउँ चलन यूहन्ना क बात सुने रहेन्ह अउर ईसू क पाछे चला गएन, ओनमाँ स एक समौन पतरस क भाई अन्दरयास रहा। ४१ उ पहले अपने भाई समौन क देखके ओसे कहेस, “हमका मसीह मिल गवा अहइ।”

४२ फिन अन्दरयास समौन पतरस क ईसू क लगे लियाइ गवा। ओनक देखके ईसू कहेस, “तू यूहन्ना क बेटवा समौन अह्या। तोहका लोग कैफा (अर्थात पतरस) कहिहइ।”

४३ दूसरे दिन ईसू गलील जाइके बरे ठान लिहेस। फिन फिलिप्पुस क देखके ईसू ओसे कहेस, “मोरे पाछे चला आवा।” ४४ फिलिप्पुस अन्दरयास अउर पतरस क नगर बैतसैदा क रहइवाला रहा। ४५ फिलिप्पुस क नतनएल मिला अउर उ ओसे कहेस, “हम पचेन्क उ मिल गवा अहइ जेकरे बारे मैं व्यवस्था मैं मूसा अउर तमाम नबियन लिखे अहइ। उहइ यूसुफ क बेटवा, नासरत क ईसू अहइ।”

४६ फिन नतनएल ओसे पूछेस, “का नासरत उ स कउनो अच्छी चीज पैदा होइ सकत ह?”

फिलिप्पुस जवाब दिहेस, “जाइके खुदइ देखि ल्या।”

४७ ईसू नतनएल क अपनी कइती आवत देखेस अउर ओकरे बारे मैं कहेस, “इ एक सच्चा इस्त्राएली अहइ जेहमाँ कउनो खोट नाही बा।”

४८ नतनएल पूछेस, “तू मोका कइसे जानत अहा?”

ईसू जवाब दिहेस, “फिलिप्पुस क बोलावइ क पहिले मई तोहका अंजीर क पेड़ क नीचे खड़ा देखे रहेउँ।”

४९ नतनएल जवाब दिहेस, “रब्बी (गुरु) तू परमेस्सर क पूत अह्या, तू इस्त्राएल क राजा अह्या।”

५० एकरे जवाब मैं ईसू कहेस, “तू इ बरे बिसवास करत अहा, काहेकि मई कहत अहउँ कि तोहका अंजीर क पेड़ क खाले देखे रहेउँ। तू अगवा (बाद मैं) अउर बड़ी बड़ी बातन देखव्या।” ५१ उ ओसे (नतनएल स) फिन कहेस, “मई तोहका सही सही बतावत अहउँ कि तू सरग क खुलत अउर

परमेस्सर क दूतन क मनई क पूत प उतरत चढ़त
‘दिखब्या।’”

काना मँ बियाह

१ गलील क काना मँ तीसरे दिन कउनो क घरे
२ मँ बियाह रहा। ईसू क महतारी हुवाँ मौजूद
रही। ३ बियाहे मँ ईसू क अउर ओनके चलन क
बोलउवा आइ रहा। ४ हुवाँ जब दाखरस खतम होइ
गवा तउ ईसू क महतारी कहेस, “ओनके पास अब
दाखरस नाही अहइ, सब खतम होइ ग।”

५ ईसू ओसे कहेस, “इ तू मोसे काहे बतावत
अहा? अबहीं मोर समइ नाही आवा अहइ।”

६ फिन ओकर महतारी नउकरन स कहेस, “तू
पचे उहइ करा जउन इ तोहसे करइ बरे कहेइ।”

७ हुवाँ पानी भरइ बरे पाथर क छ: मटका धरा
रहेन। इ मटकन क यहूदियन पवित्तर स्नान क बरे
इस्तेमाल करत रहेन। हर मटका मँ लगभग बीस
स तीस गैलन पानी आवत रहा।

८ ईसू नउकरन स कहेस, “मटकन क पानी स भर
द्या।” नउकरन मटकन क लबालब भरि दिहेन।

९ फिन उ ओनसे कहेस, “अब थोड़ा पानी बाहेर
निकाला, अउर दावत क इन्तजाम करइवाला
मुखिया क पास लइ जा।”

अउर उ पचे थोर क पानी मुखिया क पास
लइ गएन। १० फिन दावत क इन्तजाम करइवाला
मुखिया उ पानी क थोरा स चखेस तउ उ पाएस
कि इ पानी तउ दाखरस बनि गवा रहा। उ जानि
नाहीं पाएस कि दाखरस कहाँ स आइ गवा।
मुला ओन नउकरन क तउ पता रहा, जउन पानी
निकारे रहेन। ११ फिन दावत क मुखिया दुल्हा क
बोलाएस अउर ओसे कहेस, “सब मनई पहिले
अच्छी दाखरस परोसत हीं अउर जब मेहमानन
क मन भरि जात ह तउ घटिया दाखरस देइ लागत
हीं। मुला तउ सबसे बढ़िया वाली दाखरस अबहीं
तक बचाए रखे अहा।”

१२ ईसू गलील क काना मँ आपन पहिला अद्भुत
कारज कइके आपन महिमा परगट किहेस। जेहसे
ओकर चलन ओहमाँ बिसवास करेन्ह।

१३ ओकरे पाछे फिन ईसू आपन महतारी,
भाइयन अउर चलन क साथे कफरनहूम चला
गवा, जहाँ प उ पचे कछू दिन टहरेन्ह।

ईसू मंदिर मँ

(मत्ती २१:१२-१३; मरकुस

११:१५-१७; लूका १९:४५-४६)

१ यहूदियन क फसह क त्यौहार निचके रहा। इ
करण ईसू यरूसलेम चला गवा। २ हुवाँ मंदिर मँ
ईसू देखेस कि तमाम मनई मवेसियन, भेड़न अउर
कबूतरन क बेचत रहेन अउर सिक्का बदलइवाले
बयपारी अपनी गद्दी प बइठा रहेन। ३ इ बरे
उ रस्सी क एक टु कोड़ा बनाएस अउर ओन
सबका मवेसियन अउर भेड़न समेत बाहर खदेर
दिहेस। सिक्का बदलइवाले बयपारियन क सिक्का
बिखराइ दिहेस अउर ओनके चौकियन क बिखराइ
दिहेस। ४ कबूतरन क बेचइवालेन स कहेस,
“एनका सबका हियाँ स बाहेर लइ जा! मोरे
परमपिता क घर बजार जिन बनावा!”

५ इ सब देखिके ओकरे चलन क याद आइ गवा
कि पवित्तर सास्तर मँ लिखा अहइ:
“तोहरे घर बरे मोर लगन मोका खाइ जाई।” ६

७ एकरे जवाब मँ यहूदियन ईसू स कहेन, “तू
हमका सबेन्ह क कउन अद्भुत चीन्ह क तौर पइ
देखाइ सकत ह्या, जइसे इ साबित होइ जाइ कि
जउन तू करत अहा, ओकर तू अधिकारी अहा?”

८ ईसू ओनका जवाब दिहेस, “इ मंदिर क तू पचे
गिराइ द्या अउर मई एका तीन दिन क अन्दर फिन
बनाइ देब।”

९ इ सुनिके यहूदियन बोलेन, “इ मंदिर क
बनावइ मँ छियालिस बरिस लगा रहेन, अउर तू
कहत अहा कि एँका मई तीन दिन मँ बनाइ देब?”

१० मुला ईसू जउने मंदिर क बात करत रहा, उ
ओकर आपन देह रही। ११ बाद मँ जब मउत क बाद
ईसू फिन जी उठा तउ ओकरे चलन क याद आवा
कि ईसू एँका कहे रहा, अब तउ उ पचे पवित्तर
सास्तर प अउर ईसू क बात पर बिसवास करइ
लागेन।

१२ फसह क त्यौहार क दिनन जब ईसू यरूसलेम
मँ रहा, तउ तमाम मनई ओकर अद्भुत कारजन
अउर चीन्हन देखिके ओहमाँ बिसवास करइ
लागेन। १३ मुला ईसू अपने आपका ओनके सहारे
नाहीं छोडेस, काहे स कि उ सबका बखूबी जानत
रहा। १४ ओका इ बात क कउनो जरूरत नाही रही
कि केहू आइके ओका लोगन क बारे मँ बतावइ,

११:५१ परमेस्सर ... चढ़त उत्पति २८:१२.

१२:१७ उद्गत भजन संहिता ६९:१.

एँह बरे कि उ अच्छी तरह जानत रहा कि लोगन क मन मँ का अहइ।

ईसू अउर नीकुदेमुस

३ हुआँ फरीसियन क एक ठु मनई रहा, जेकर नाउँ रहा नीकुदेमुस। उ यहूदियन क नेता रहा। २ उ ईसू क लगे रात मँ आवा अउर ओसे बोला, “गुरू, हम जानत अही कि तू गुरू अह्या अउर परमेस्सर तोहका भेजेस, इहइ कारण अहइ कि तू अइसे अइसे अद्भुत कारजन करत अहा। इ सब कारज परमेस्सर क सहायता क बिना कउनो नाही करि सकत।”

३ एकरे जवाब मँ ईसू ओहसे कहेस, “मइँ तोहका एकदम सच सच बतावत अहउँ कि अगर कउनो मनई एकदम स नवा जनम न लेइ तउ उ परमेस्सर क राज्य नाही देख सकत।”

४ नीकुदेमुस ओसे कहेस, “कउनो मनई बुढवा होइ क बाद फिन जनम कइसे लइ सकत ह? कउनो अपनी महतारी क कोख मँ घुसि क जनम कइसे लइ सकत ह?”

५ ईसू जवाब दिहेस, “मइँ तोहका सच बतावत अहउँ। अगर कउनो मनई पानी अउर आतिमा स जनम नाही लेत तउ उ परमेस्सर क राज्य मँ घुसइ नाही पावत। ६ जउन सरीर स पइदा होइ सकत ह, उहइ सरीर अहइ जउन आतिमा स पइदा होत ह, उहइ आतिमा अहइ। ७ मइँ तोहसे जउन बताए अहउँ, ओहमाँ कउनो अचरज करइ क जरूरत नाही अहइ, ‘तोहका फिन स जनम लेइ क होई।’

८ हवा जउने तरफ चाहत ह, उहइ तरफ बहत ह। तू ओकर आवाज तउ सुनि सकत ह, मुला तू इ नाही जानि सकत ह कि उ कहाँ स आवत अहइ अउर कहाँ जात अहइ। आतिमा स पइदा भवा हर एक मनई इहइ तरह अहइ।”

९ एकरे जवाब मँ नीकुदेमुस ओसे कहेस, “इ कइसे होइ सकत ह?”

१० ईसू ओका जवाब दिहेस, “तू तउ इस्राएलियन क गुरू अह्या मुला तू इ बात नाही जानत रह्या? ११ सच्ची बात मइँ बतावत अहउँ, हम पचे जउन जानत अही, उहइ बतावत अही, जउन हम देखत अही मुला तू पचे हमरी बात मँ कम बिसवास करत अहा। १२ मइँ तोहका धरती क बात बतावत अहउँ, अउर तू ओका नाही मानत अहा, अबहीं जब मइँ तोहका पचे क सरग क बात बतावउँ तउ तू ओका कइसे मान लेब्या? १३ सरग मँ कबहुँ कउनो नाही गवा, केवल ओका छोड़

कर, जउन सरग स उतरके आवा ह—उहइ मनई क पूत।

१४ “जइसे मूसा रेगिस्तान मँ साँप क उठाइ लिहे रहा वइसे मनई क पूत क ऊपर उठाइ लीन्ह जाई। १५ जइसे कि ओहमाँ बिसवास करइवाले सब मनई अनन्त जीवन पाइ सकई।”

१६ परमेस्सर इ दुनिया स इतना पिरम करत रहा कि अपने एकलौता पूत क दइ दिहेस, जइसे कि ओहमाँ बिसवास करइवाला कउनो मनई क नास न होइ, ओका अनन्त जीवन मिल जाइ। १७ परमेस्सर आपन पूत इ बरे नाही पटएस कि उ दुनिया क अपराधी साबित करइ, उ तउ इ बरे भेजेस अइसे कि समूची दुनिया क उद्धार होइ जाइ। १८ जउन मनई परमेस्सर क पूत मँ बिसवास करत हीं, ओनका दोसी न ठहरावा जाइ, मुला जे ओनके मँ बिसवास नाही करतेन, ओका तउ दोसी ठहरावा जाइ चुका अहइ, काहेकि उ परमेस्सर क एकलौता पूत मँ बिसवास नाही करत ह। १९ इ निरनय क आधार इ बाटइ कि ज्योति इ दुनिया मँ आइ गइ अहइ, मुला कछू मनई अइसे अहइँ कि ज्योति क न देखिके आँधियारे क जियादा महत्व देत अहइँ काहेकि ओनके सब करम बुरा अहइँ। २० पाप करइवाला मनई हमेसा ज्योति स घिणा करत ह अउर ओकरे पास कबहुँ नाही आवत, एह बरे कि ओकरे पाप क उजागिर होइ क डर बना रहत ह। २१ मुला जउन मनई सच्चाई क रस्ता प चलत ह उ परमेस्सर क द्वारा ज्योति क किरन क लगे अइहीं जइसे इ उजागिर होइ जाइ कि ओके सब कारज परमेस्सर करावत अहइ।

यूहन्ना ईसू क बपतिस्मा दिहेस

२२ ओकरे बाद ईसू अपने चलन क साथ यहूदिया क इलाका मँ चला गवा। हुवाँ ओनके साथ ठहरिके उ सब लोगन्ह क बपतिस्मा देइ लाग। २३ हुवाँ प सालेम क नजदीक ऐनोन मँ यूहन्ना भी बपतिस्मा देत रहा, एह बरे कि हुवाँ इफरात मँ पानी रहा। तमाम मनई हुवाँ आवत रहेन अउर बपतिस्मा लेत रहेन। २४ (अब तक यूहन्ना क बंदी नाही बनावा ग रहा।)

२५ अब यूहन्ना क कछू चलन अउर एक ठु यहूदी क बीच स्वच्छताकरण क लइके बहस होइ लाग। २६ एह बरे उ सब यूहन्ना क लगे आएन अउर कहेन, “गुरू, जउन मनई यरदन क ओहँ पार तोहरे साथ रहा अउर जेकरे बारे मँ तू बताए रह्या, उ लोगन्ह क बपतिस्मा देत अहइ, अउर सब मनई ओकरे पास जात अहइँ।”

२७ एकरे जवाब मैं यूहन्ना कहेस, “कउनो मनई क तब तक कछू नाहीं मिल सकत जब तक कि ओका परमेस्सर स न दीन्ह ग होइ। २८ तू पचे इ बात क साच्छी अहा कि मई कहे रहेउँ, ‘मई मसीह न अहउँ मोका तउ ओकरे बरे रस्ता बनाइ बरे पठवा गवा अहइ।’ २९ दूल्हा तउ उहइ वा, जेका दुलहिन मिलइ। मुला दूल्हा क दोस्त जउन ओकरे अगुवाई मैं खड़ा रहत ह जब दूल्हा क आवाज सुनत ह, तउ बहुत खुस होत ह। इहइ मोर खुसी अहइ जउन अब पूरी भइ। ३० अब इ जरूरी अहइ कि ओकर महिमा बढ़इ अउर मोर कम होइ।

उ जउन सरग स उतर

३१ “जउन ऊपर स आवत ह, उ सबसे महान अहइ। उ जउन धरती स बाटइ, धरती स जुड़ा अहइ। एह बरे उ धरती क चीजन क बारे मैं बात करत ह। जउन सरग स उतरा ह, सबके ऊपर अहइ, ३२ उ जउन कछू देखे अहइ, अउर सुने अहइ, उ ओकर साच्छी देत ह अउर ओकर साच्छी क कउनो मनई नाहीं चाहत। ३३ जउन ओकरी साच्छी क मानत ह, उ परमाणित करत ह कि परमेस्सर सच्चा अहइ। ३४ काहे बरे कि जेका परमेस्सर पठए अहइ, परमेस्सर क बातन करत ह। काहेकि परमेस्सर ओका आतिमा क अनन्त दान दिहे अहइ। ३५ परमपिता अपने पूत क स पिरम करत ह अउर ओकरे हाथे मैं उ सब कछू क अधिकार सौंपि दिहेस। ३६ एह बरे जउन ओकरे पूत मैं बिसवास करत ह, अनन्त जीवन पइहइ मुला जे परमेस्सर क पूत क बात नाहीं मानत ओका इ जीवन नाहीं मिली। एकरे बजाय उ परमेस्सर क कोप का भाजन बनी।”

ईसू अउर सामरी स्त्री

१ अउर जब ईसू क पता चला कि फरीसियन इ सुने अहइ कि ईसू यूहन्ना स जियादा लोगन क बपतिस्मा देत अहइ अउर ओनका आपन चलन बनावत अहइ। २ (वइसे ईसू खुदइ बपतिस्मा नाहीं देत रहा। बल्कि ओकर चलन इ कारज करत रहेन्ह।) ३ उ यहूदिया छोड़िके एक बार फिन गलील लौट ग रहा। ४ इ दाई ओका सामरिया होइके जाइका पड़ा।

५ एह बरे उ सामरिया क एक नगर सूखार मैं आवा। इ नगर उहइ भुइया क पास रहा। जउने

क याकूब अपने बेटवा यूसुफ क दिहे रहा ६ हुवाँ याकूब क कुआँ रहा। ईसू इ जातरा मैं एकदम थक ग रहा, एह बरे उ कुआँ क पास बइठ गवा। उ समइ करीब करीब दुपहरिया रही। ७ एक ठु सामरी **स्त्री पानी भरइ क बास्ते आइ! ईसू ओसे कहेस, “मोका पिअइ क पानी दइ द्या।” ८ उ समइ सब चलन खाना बेसहइ क बरे सहर चला गवा अहइ न। ९ सामरी स्त्री ओसे कहेस, “तू यहूदी होइके मोसे पानी काहे मांगत अहा, मई तउ सामरी स्त्री अहउँ?” (यहूदी तउ सामरियन स कउनो मतलब नाहीं रखत रहेन।)

१० ओकरे जवाब मैं ईसू ओसे कहेस, “जदी तू एँतना जनतेउ कि परमेस्सर का दिहेस अउर उ कउन अहइ जउन तोहसे कहत अहइ कि ‘मोका पानी द्या’ तउ तू ओसे खुदइ मँगतिउ, अउर उ तोहका जीवन जल दइ देत।”

११ उ स्त्री ओसे कहेस, “महासय, तोहरे लगे तउ कउनो बासन तक नाहीं बाटइ अउर कुआँ बहुत गहिर अहइ फिन तोहरे पास जीवन जल कइसे होइ सकत ह? १२ जरूर तू हमरे पूर्वज याकूब स बड़ा अहा जेक हमका कुआँ दिहेन अउर अपने लड़िकन्ह अउर जानवरन्ह क साथ खुदइ एकर पानी पिए रहेन्ह।”

१३ ईसू एकरे जवाब मैं कहेस, “जउन मनई इ कुआँ क पानी पिअत ह, ओका फिन पियास लगी। १४ मुला जउन मनई उ पानी क पी लेई जउन पानी मई देब, ओका फिन कबहूँ पियासन लगी। मोर दीन्ह पानी ओकरे दिल मैं एक पानी क झरना क नाई बन जाई जउन घुमइ घुमइ क ओका अनन्त जीवन देई।”

१५ तब उ स्त्री ओसे कहेस, “हे महासय, मोका उहइ पानी दइ द्या जेहसे कि मई कबहूँ पियासी न रही अउर मोका फिन पानी खँइचे क बरे न आवइ क पड़इ।”

१६ इ सुनके ईसू ओसे कहेस, “जा अपने पति क बोलावा अउर हियाँ आवा।”

१७ एकरे जवाब मैं स्त्री कहेस, “मोर कउनो पति नाहीं बाटइ।”

ईसू ओसे कहेस, “जब तू कहति अहा कि तोहार कउनो पति नाहीं बाटइ, तउ तू ठीक कहति अहा १८ तोहरे पाँच पति रहेन अउर जउने पुरूस क साथ तू रहित अहा, उ तोहार पति न अहइ, एह बरे जउन तू कहति अहा उ ठीक अहइ।”

**४ :७ सामरी सामरिया स आए भएन। सामरी कछू यहूदी रहेन, मुला यहूदी ओनका सुद्ध यहूदी नाहीं मानत रहेन।

१९ इ सुनिके उ स्त्री ओसे कहेस, “महासय, मोका तउ लागत अहइ कि तू कउनो नबी अहा। २० हमरे पूर्वजन इ पर्वत प आराधना किए रहेन्ह मुला तू कहत अहा कि यरूलेम आराधना क स्थान अहइ।”

२१ ईसू ओसे कहेस, “हे स्त्री मोरी बात माँ बिसवास करा। उ समइ आवइवाला अहइ जब तू परमपिता क आराधना न तउ एहि पर्वत प करइ पउवू अउर न तउ यरूलेम मँ। २२ तू सामरी लोगन्ह ओका नाही जानत अहइ जेकर आराधना करत अह। मुला हम यहूदी ओका जानित ह जेकर आराधना करत अहा। सबन क उद्धार यहूदियन स मिली। २३ मुला उहइ समइ आवत अहइ, ‘अउर आइ ग’ बाटइ जब सच्चे आराधकन परमपिता क आराधना, आतिमा अउर सच्चाई मँ करिहीं। परमपिता अइसे आराधक चाहत ह। २४ परमपिता आतिमा अहइ अउर एह बरे जउन ओकर आराधना करी ओका आतिमा अउर सच्चाइन मँ आराधना करइ क पड़ी।”

२५ फिन स्त्री ओसे कहेस, “मइँ जानत अहउँ कि मसीह आवइवाला अहइ।” (यानी “ख्रीष्ट”) “जब उ आई तउ हम पचन क सब कछू बताई।”

२६ ईसू ओसे कहेस, “मइँ जउन तोहसे बतियात अहउँ मइँ उहइ अहउँ।”

२७ उहइ समइ ओकर चेलन लौट आएन। अउर ओनका इ देखिके बहुत अचरज भवा कि उ एक ठु स्त्री स बात करत अहइ। मुला कउनो ओह इ नाही कहेस, “तोहका इ स्त्री स का मतलब अहइ?” अउर या “ई स्त्री स तू काहे बरे बतियात अहा?”

२८ उ स्त्री आपन पानी भरइवाली गगरी छोड़िके सहर चली गइ अउर मनइयन स कहेस, २९ “आवा जा अउर देखा, एक ठु अइसा मनई अहइ, जउन मोर कीन्ह सच मोका बताइ दिहेस। का तू इ नाही सोचत अहा कि उ मसीह अहइ?” ३० इ सुनिके सब लोगन्ह सहर छोड़िके ईसू क लगे जाइ पहुँचैन।

३१ उहइ समइ ईसू क चेलन ओसे बिनती करत रहेन्ह, “गुरू कछू खाइ ल्या।”

३२ मुला ईसू ओनसे कहेस, “मोरे पास खाइ बरे, अइसा खाना अहइ जेकरे बारे मँ तू पचे कछू नाही जानत अहा।”

३३ इ सुनिके सब चेलन आपस मँ एक दूसरे स पूछइ लागेन, “का ओकरे बरे कउनो खाइ बरे कछू लिआवा होई?”

३४ ईसू ओनसे कहेस, “मोर खाना ओकर (परमेस्सर) इच्छा क पूरी करब अहइ जउन मोका पटएस ह। जउन कारज मोका सौपा गवा बाटइ, ओका मोका पूरा करइ क अहइ, ३५ तू पचे अक्सर कहत ह, ‘चार महीना बाकी बा तब जाइके फसल आई’ मुला मइँ तोहका पचेन्क बतावत अही कि आपन आपन आँखी खोला अउर खेतन क तरफ देखा उ सब काटइ क बरे तइयार होइ गवा अहइ। उ जउन कटाई करत अहइ आपन मजूरी पावत अहइ। ३६ अउर अनन्त जीवन क बरे फसल इकट्ठा करत बा, एह बरे कि फसल बोवइवाला अउर ओका काटइवाला दुइनउँ साथे साथे खुस रहइ। ३७ इ हमार बात एकदम स सच्ची निकरी, ‘एक मनई बोवत ह अउर दूसर मनई ओका काटत ह।’ ३८ मइँ तोहका इ फसल काटइ क बरे भेजे अही जेहि पइ तोहार मेहनत नाहीं लागी बाटइ। जेहि पइ दूसरे क मेहनत लगी अहइ अउर ओकरी मेहनत क फल तोहका मिला अहइ।”

३९ उ सहर क तमाम मनइयन ईसू मँ बिसवास किहेन, एह बरे कि उ स्त्री क बात क सच्ची मान लिहेन जउन कहेस, “मइँ जउन कछू करे रहेउँ, उ ओका ओकरे बारे मँ सब बताइ दिहेस।” ४० जब सामरी ओकरे पास आएन तउ ओन सबे ओसे ठहरइ क बरे चिरोरी करेन्ह एँकरे बाद उ दुइ दिन हुवाँ ठहर गवा। ४१ ओकरी बात स प्रभावित होइके तमाम जने ओहमाँ बिसवास करइ लागेन। ४२ ओन सब उ स्त्री स कहेन, “अब हम सिरिफ तोहरी साच्छी क नाई बिसवास ही नाहीं करत अही, मुला अब तउ हम सब खुदइ सुनि अउर देख लीन्ह। अब हम पचे जान लीन्ह कि सचमुच उ मनई संसार क उद्धार करइवाला बाटइ।”

राजकर्मचारी क बेटवा क जीवन दान

(मत्ती ८ :५-१३ ; लूका ७ :१-१०)

४३ दुइ दिन क बाद उ हुवाँ स गलील क चल दिहेस। ४४ (एक बरे कि ईसू खुद कहे रहा कि कउनो नबी अपने देस मँ कबहुँ आदर नाहीं पावत।) ४५ इ तरह जब उ गलील आवा तउ गलील क रहइवाले ओकर स्वागत करेन्ह काहे बरे उ पचे उ सबइ कछू लखे रहेन्ह जउन कछू फसह क त्यौहार यरूलेम मँ उ किहे रहा : काहेकि उ पचे सबहिं त्यौहार मँ सामिल रहेन।

४६ ईसू एक बार फिन गलील मँ काना गवा जहाँ उ पानी क दाखरस बनाइ दिहे रहा। अब की दाई कफरनहूम मँ एक ठु राजकर्मचारी रहा जेकर बेटवा बीमार रहा। ४७ जब राजकर्मचारी सुनेस

कि यहूदिया स ईसू गलील आवा अहइ तउ उ ओकरे पास आवा अउर इ विनती किहेस कि उ कफरनहूम जाइके ओकरे बेटवा क चंगा कइ दे ओकर बेटवा एकदम मरइ क किनारे आइ गवा रहा। १८ ईसू ओसे कहेस, “अद्भुत कारजन अउर अचरजे कारजन क देखे बिना तू पचे बिसवास न करव्या।”

१९ राजकर्मचारी ओसे कहेस, “महासय, एकरे पहले कि मोर बेटवा मरि जाइ, तू मोरे साथे घरे चला।”

२० ईसू जवाब दिहेस, “जा तोहार बेटवा जिअत रही।” ईसू जउन कहे रहा, उ पचे ओह पइ बिसवास किहेस अउर घर चला गवा। २१ उ घर लौटत ही रास्ते मँ रहा कि ओकर नउकर मिल गएन अउर इ समाचार सुनाएन, “तोहार बेटवा चंगा होइ गवा।”

२२ उ पूछेस, “ओकर हालत कब स ठीक होइ लाग ह?”

उ जवाब दिहसे, “कल दुपहरिया मँ एक बजे ओकर बुखार उतर गवा।”

२३ उ लरिका क बाप क इ याद आइ गवा कि इहइ ठीक समइ रहा जब ईसू ओसे कहेस, “तोहार बेटवा जिअत रही।” इ तरीका स ओकर पूरा परिवार ईसू मँ बिसवास करइ लाग।

२४ इ दूसर अद्भुत कारज रहा जउन ईसू यहूदियन क गलील आए क बाद देखाएस।

पोखरे प लाइलाज मरीज क ठीक होब

१ एकरे बाद ईसू यहूदियन क एक उत्सव मँ यरूसलेम गवा। २ यरूसलेम मँ भेड़ दरवाजा क पास एक टु पोखरा अहइ, जेहिका इब्रानी भाखा मँ बेतहसदा कहा जात ह। एकरे किनारे पाँच टु बरामदा बना अहइ। ३ जउने मँ अँधा, लूला, अउर लकवा का मरीज क भीड़ पड़ी रहत ह। अउ उ पचे पानी ह हलइ बरे जोहेन। ४ कबहूँ पभूँ क दूत पोखरे प आवत रहा अउ पानी क हलावत रहा। सरगदूत क इ करइ क पाछे जउन पहिला मनई पोखरे मँ धुसत रहा उ बेरामी स नीक होइ जात रहा। ५ एँही मरीजन मँ एक अइसा मरीज रहा जउन अड़तीस बरिस स बीमार रहा। ६ जब ईसू ओका हुवाँ लेटा लखेस अउर इ जानेस की एँतन लम्बे समइ बीमार अहइ तउ ईसू ओसे कहेस, “का तू चंगा होइ चाहत अहा?”

७ रोगी जवाब देहेस, “महासय मोरे पास केउ नाहीं अहइ जउन पानी क हिलइ प मोका पोखरा मँ उतार देइ। जउ मइँ पोखरा मँ जावा चाहित ह, तउ हमेसा कउनो दूसर मनई मोसे पहिले ओहमाँ उतर जात ह।”

८ ईसू ओसे कहेस, “खड़ा होइ जा, आपन बिस्तरा उठावा अउर उ चलइ लागा।”

९ उ मनई तुरतहि चंगा होइ गवा। उ आपन बिस्तरा उठाएस अउर चल दिहेस।

उ दिन सबित क दिन रहा। १० इ देखिके यहूदियन उ मनई जउन चंगा होइ गवा रहा स कहब सुरू किहेन, “आज सबित क दिन अहइ अउर इ हमरे नियम क खिलाफ अहइ कि तू आपन बिस्तरा उठावा।” ११ इ सुनिके उ जवाब दिहेस, “जउन मोका चंगा किहे बाटइ उ मोसे कहेस, ‘आपन बिस्तरा उठावा अउर चल द्या।’”

१२ उ पचे ओसे पूछेन्ह, “उ कउन मनई अहइ जउन तोहसे कहेस कि आपन बिस्तरा उठावा अउर चला?”

१३ मुला उ मनई जउन चंगा होइ गवा रहा नाहीं जानत रहा कि उ कउन अहइ, काहे? कि हुवाँ बहुत भीड़ रही अउर ईसू चुपचाप हुवाँ स चला गवा।

१४ एँकरे बाद ईसू उ मनई क मन्दिर मँ देखेस अउर ओसे कहेस, “देखा, अब तू नीक होइ गवा अहा, एह बरे अब तू पाप करब बन्द कइ द्या नाहीं तउ कउनो अउर बड़ा कस्ट तोहरे ऊपर आइ सकत ह!”

१५ फिन उ मनई चला गवा। हुवाँ स चलिके उ यहूदियन स आइ क कहेस की ओका चंगा करइवाला ईसू रहा।

१६ यहूदियन ईसू क सताउब सुरू कइ दिहेन्ह, एह बरे कि उ अइसे काम सबित क दिन किहे रहा। १७ ईसू ओनका जवाब देत कहेस, “मोर परमपिता कबहुँ? काम करब नाहीं छोड़त, एह बरे मइँ काम करित हउँ।”

१८ यहूदियन ओका मार डावइ क इन्तजाम करइ लागेन्ह। केवल इहइ बरे नाहीं कि उ सबित क तोड़त रहा, मुला इहइ बरे कि उ परमेस्सर क आपन परमपिता कहत रहा। इहइ तरीके स उ अपने क परमेस्सर क बराबर देखौवत रहा।

ईसू क साच्छी

१९ जवाब देत ईसू ओनसे कहेस, “मइँ तू सब पचन क सच्ची बात बतावत अहउँ कि पूत अपने

११५ :४ अउ ... रहा पद ३-४ कछू यूनानी प्रतियन मँ इ भाग जोड़ा गवा अहइ।

आप कछू नाहीं कइ सकत। उ तउ केवल उहइ करत ह जउन करत अपने परमपिता क देखत ह। परमपिता जउन कछू करत ह, पूत उहइ करत ह।
 २० परमपिता अपने पूत स पिरम करत ह। अउर उ सब कछू देखाइ देत ह जउन उ करत ह। ओन सब कामन स बड़ी-बड़ी बातन क उ ओका देखाई। तउ तू पचे अचरज करब्या।
 २१ जइसे परमपिता मरा पूत क उठाइके ओनका नवा जीवन देत ह। वइसे ही भी उन लोगन क जीवन देत ह, जेनका चाहत ह।

२२ “परमपिता केहू क निआव नाहीं करत मुला उ निआव करइके अधिकार अपने पूत क दइ दिहे अहइ।
 २३ जेहसे कि सबहीं मनई क पूत क मान सम्मान करइ जेहसे कि परमपिता क सबहीं आदर करत हीं। जउन पूत क आदर नाहीं करत परमपिता उ क आदर नाहीं करत जउन ओका पटए अहइ।

२४ “मई तोहका सच-सच बतावत हउं जउन मोर बात सुनत ह अउर ओह पइ बिसवास करत ह जउन ओका भेजे अहइ, तउ उ अनन्त जीवन पावत ह। निआव क दंड ओकरे ऊपर नाहीं पड़त। उ मनई मृत्यु स जीवन मँ प्रवेस पाइ जात ह।
 २५ मई तू पचन क बतावत अहउं कि उ समइ आवइवाला अहइ, हियाँ तक कि आइ चुका अहइ जबहीं कि जउन मरि चुका अहइ, परमेस्सर क पूत क बचन सुनिहइ अउर जे ओका सुनि लेहीं उ पचे जी उठिहीं।
 २६ काहेकि जेहसे परमपिता जीवन क स्त्रोत अहइ, वइसे अपने पूतन क जीवन क स्त्रोत बनाए बाटइ।
 २७ अउर उ ओका निआव क अधिकार दिहे अहइ। एह बरे कि उ मनई क पूत अहइ।

२८ “इ बात प अचरज करइ क जरूरत नाहीं अहइ कि उ समइ आवइवाला अहइ कि जब जउन अपनी अपनी कब्र मँ अहइ, ओकर बचन सुनिहइ।
 २९ अउर बाहर आइ जइहइ। जउन मनई नीक कारज किहे अहइ उ सबइ पुनरूत्थान पाइ जइहइ। मुला जउन खराब कारज किहे अहइ ओनका पुनरूत्थान क बाद दंड दीन्ह जाई।”

३० “मई खुदइ अपने आप स कछू नाहीं कइ सकित। मई परमेस्सर स जउन सुनित ह उहइ क आधार प निआव करित ह अउर मोर निआव ठीक अहइ काहेकि मई अपने मन स कउनो नाहीं करित मुला मई ओकरी इच्छा स कारज करित ह जउन मोंका पटए स।

ईसू क यहूदियन स कहब

३१ “जदि मई अपनी तरफ स साच्छी देउं तउ मोर साच्छी सच नाहीं अहइ।
 ३२ मोर ताई साच्छी देइवाला एक ठु अउर अहइ। अउर मई जानित ह कि मोरी ताई जउन साच्छी देत अहइ उ सच्ची अहइ।

३३ “तू पचे लोगन क यूहन्ना क पास पटए रह्या अउर उ सच्चाई क साच्छी दिहेस।
 ३४ मई मनई क साच्छी प भरोसा नाहीं करित मुला मई इ बरे कहत हउं जइसे कि तू पचनक उद्धार होइ जाइ।
 ३५ यूहन्ना उ दीपक क नाई रहा जउन जलत भइ रोसनी देत हे। अउर कछू समइ तक तू पचे उ रोसनी स फायदा लेइ चाहत रह्या।

३६ “मुला मोर साच्छी यूहन्ना क साच्छी स बड़ी बाटइ, यह बदे कि परमपिता जउन कारज पूरा करइ क बरे मोका जिम्मेवारी सौपी अहइ, मई उहइ कारज करत अहउं अउर मोर कीन्ह कारज अपने आपइ इ बात क साच्छी अहइ कि परमपिता मोंका पटए अहइ।
 ३७ परमपिता जउन मोंका पटए अहइ, उ खुदइ मोर साच्छी दिहे अहइ। तू पचे ओकर कउनो बचन नाहीं सुन्या अउर न तउ ओकर रूप लखे अहा।
 ३८ अउर न तउ अपने अन्दर ओकर संदेस धारन करे अहा, काहेकि तू पचे जेका परमपिता भेजे अहइ, ओकरे मँ बिसवास नाहीं करता अहा।
 ३९ तू पचे पवित्र सास्तरन क धियान स पढ़त ह काहेकि तोहार इ विचार अहइ कि तोहका उहइ स अनन्त जीवन मिल जाई। मुला इ सब पवित्र सास्तर मोर साच्छी देत हीं।
 ४० एतना होत भए भी तू पचे मोर पास नाहीं आवा चाहत अहा।

४१ “मई मनइयन क कीन्ह प्रसंसा प भरोसा नाहीं करित।
 ४२ मुला मई जानित ह कि तोहार भीतर परमेस्सर क पिरम नाहीं अहइ।
 ४३ मई अपने परमपिता क नाउं स आइ अहउं तबहूँ तू पचे स्वीकार नाहीं करत अहा, अउर अगर कउनो दूसरे नाउं स कहे आइ जाइ तउ तू ओका स्वीकार करब्या।
 ४४ तू मोहे मँ बिसवास कइसे करि सकत ह, काहे बरे कि तू पचे एक दूसरे क प्रसंसा करत ह। तू पचे उ प्रसंसा कइती देखबउ नाहीं करत अहा जउन केवल परमेस्सर क तरफ स आवत अहइ।
 ४५ तू पचे इ तनिकउ न सोचा कि मई तोहका परमपिता क सामने दोखी ठहराऊब। जउन तोहका पचे क दोखी ठहराई, उ मूसा होई जेकरे ऊपर तू पचे आपन आसरा लगाए अहा।
 ४६ जदि तू सबइ मूसा मँ बिसवास करत्या तउ तू

मोहे मैं बिसवास करत्या काहेकि उ मोरे बारे मैं लिखे अहइ।^{१७} जबहीं तू ओकरे लिखे मैं बिसवास नाही करत अहा, तउ तू मोरे बात मैं बिसवास कइसे करब्या?"

पाँच हजार स जियादा मनइयन क भोजन

(मत्ती १४ :१३-२१ ; मरकुस

६ :३०-४४ ; लूका ९ :१०-१७)

१ ओकरे बाद ईसू गलील क झील यानी कि ६ तिबिरियास क दूसरे पार चला गवा।^२ अउर ओकरे पाछे, पाछे बहुत बड़ी भीड़ चल दिहेस, काहेकि उ सब तमाम मरीजन क नीक होत समइ तमाम अचरज भरा चीन्हन देखे रहेन्ह।^३ ईसू पहाड़ प चला गवा अउर हुँवा अपने चलन क साथ बइठ गवा।^४ यहूदियन क फसह क त्यौहार निचके रहा।

^५ जबहीं ईसू आँख उठाइके देखेस कि एक बहुत बड़ी भीड़ ओकरी तरफ चली आवत अहइ तउ उ फिलिप्पुस स पूछेस, "इ सब लोगन्हे क खइया खियावइ क बरे रोटी कहाँ स खरीदी जाइ सकत ह?"^६ (ईसू इ बात ओकर परीच्छा लेइ क बरे पूछेस, उ तउ जानत रहा कि उ क करइ जात अहइ।)

^७ फिलिप्पुस जवाब दिहेस, "दुई सौ चाँदी क सिक्कन स एतनी रोटी न मिली कि सब मनई क एक टुकड़े स तनिकउ जियादा मिल सकइ।"

^८ ईसू क एक दूसर चेला समौन पतरस क भाई अन्द्रियास कहेस,^९ "हियाँ एक नान्ह क लरिका क लगे पाँच टु जौ क रोटी अउर दुइ टु मछरी अहई, मुला खाइवाले तउ बहुत जियादा मनई अहई ओनके बरे इ बहुत कम अहइ।"

^{१०} ईसू जवाब दिहेस, "सब लोगन्ह क बैठावा।" उ जगह प अच्छी खासी घास रही सब मनई हुवाँ बइठ गएन उ सब कुल मिलाइके करीब पाँच हजार मनई रहेन्ह।

^{११} फिन ईसू रोटी लिहेस, अउर हुवाँ बइठे भए मनइयन क आवस्यकतानुसार सुक्रिया दइके रोटी परोस दिहेस। इहइ तरह जेतना उ सब जेतना चाहत रहेन, ओतनी मछलियन ओनका दइ दिहेस।

^{१२} जब ओनके सबके पेट भरि गएन तउ ईसू अपने चलन स कहेस, "जउन टुकड़ा बचा अहई, ओनका बटोर ल्या जइसे उ बेकार स बरबाद न होई।" ^{१३} फिन चलन लोगन क परोसी गइ जो क पाँच रोटियन क बचे भएन टुकड़न स बारह टोकरी भरि दिहसे।

^{१४} ईसू क एतना अद्भुत कराज क देखिके सब मनइयन कहइ लागेन, "जरूर इ मनई उहइ नवी अहइ जेका इ दुनियाँ मैं आवइ क रहा।"

^{१५} ईसू जब इ जानेस कि लोग आवइवाला अहई अउर ओनका लइ जाइके राजा बनावा चाहत अहई, तउ उ अकेलेही पहाड़ प चला गवा।

ईसू क पानी प चलब

(मत्ती १४ :२२-२७ ; मरकुस ६ :४५-५२)

^{१६} जब साँझ क बेला भइ अउर ओनके सब चलन झील प चला गएन ^{१७} अउर एक ठु नाव प बइठके वापस झील क पार कफरनहूम क तरफ चला गएन। मजे क अंधेरा होइ ग रहा, मुला ईसू अबहीं तलक लौटिके ओनके सबन क पास नाही आवा रहा। ^{१८} तूफानी हवा बहत रही जेकरे कारण झील मैं लहर खूब तेज होत रहिन्ह। ^{१९} जब उ पचे करीब पाँच-छः किलोमीटर आगे चला गएन तउ देखेन कि ईसू झील प चलत अहइ अउर नाव क पास आवत रहा। इ देखिके उ पचे डेराइ गएन। ^{२०} मुला ईसू ओन सबसे कहेस, "इ मई अहउ, डेरा जिन।" ^{२१} फिन उ पचे ओका जल्दी स नाव प चढ़ाइ लिएन्ह अउर नाव जल्दी स हुवाँ पहुँच गइ जहाँ ओका जाइ क रहा।

ईसू क खोज

^{२२} दूसरे दिन सब मनइयन क भीड़ जउन झील क पार बच गइ रही, इ देखेस कि हुवाँ एक ठु नाव अकेले रही अउर अपने चलन क साथ ईसू उ नाव प नाही सवार भवा बल्कि ओकर चलन अकेल्ले ही रवाना भएन। ^{२३} तिबिरियास क कई ठु नाव उ जगह प आइके रूकिन जउने जगह प उ पचे पभू क धन्यवाद दिहे क बाद रोटी खाए रहेन। ^{२४} इ तरह जब उ भीड़ देखेस कि न तउ हुवाँ ईसू अहइ अउर न तउ ओनकइ चलन अहई, तउ उ पचे नाव प चढ़िके अउर ईसू क दूढ़त कफरनहूम क तरफ चल पड़ेन।

ईसू जीवन क रोटी

^{२५} जब उ पचे ईसू क झील क दूसरे पार पाएन तउ ओसे कहेन, "हे गुरू, तू हियाँ कब आया?"

^{२६} एँकरे जवाब मैं ईसू ओनसे कहेस, "मई तोहका सच्ची बात बतावत अहउँ, तू पचे मोका इ बरे नाही खोजत अहा कि तू सब अद्भुत कारजन देखे अहा, मुला तू पचे इ बरे मोका दूढ़त अहा, काहेकि तू सब पेट भरिके रोटी खाए अहा। ^{२७} उ खाना क बरे मेहनत न करइ चाही जउन खराब

होइ जाइ मुला ओकरे बरे जतन करइ चाही जउन हमेसा उत्तम बना रहत ह अउर अनन्त जीवन देत ह, जउन तोहका सबक मनई क पूत देई। काहेकि परमपिता ओका मानके आपन मोहर ओह पइ लगाइ दिहे अहइ।”

२५ मनइयन ईसू स पूछेन, “परमेस्सर क कारज क बरे हम सब का करी?”

२६ ईसू ओनका इ जवाब दिहेस, “जउन परमेस्सर चाहत ह कारज इ अहइ कि तू पचे ओह पइ बिसवास करा जेहिका उ भेजे अहइ।”

३० तउ उ पचे ओसे कहेन, “फिन तू कउन स अदभुत कारज देखौवत अहा जेहिका देखिके हम तोह पर बिसवास करी? तू कउन स कारज देखौवत अहा? ३१ हमार पूर्वजन रेगिस्तान मँ मन्ना खाएन, जइसे कि पवित्र सास्तरन मँ लिखा बा, ‘परमेस्सर ओनका खाइ क बरे सरग स रोटी दिहेस।’ ३२”

३२ एह पइ ईसू ओनसे कहेस, “मई तोहका सच बतावत अहउँ कि मूसा नाही, मुला मोर परमपिता तोहका सरग स सच्ची रोटी देत ह। ३३ उ रोटी जउन परमेस्सर देत ह, उ सरग स उतरी अहइ, अउर इ संसार क जीवन देत ह।” ३४ तउ उ पचे ओसे कहेन, “हे पभू, अब हम पचे क उ रोटी द्या अउर हमेसा देत रहा।”

३५ ईसू ओनसे कहेस, “मई उ रोटी अहउँ जउन जीवन देत ह। जउन मनई मोरे पास आवत ह, उ कबहू भूखा नाही रहत अउर जउन मोरे मँ बिसवास करत ह, उ कबहू पियासा नाही रहत। ३६ मई तोह सबन क पहले स बताइ चुका अहउँ कि तू मोका देख लिए अहा, तबहू मोहमाँ बिसवास नाही करत्या। ३७ एक एक मनई जेहिका परमपिता मोका सौपे अहइ, मोरे पास आई जउन मोरे पास आवत ह, मई ओका कबहू न लौटाउब। ३८ मई सरग स अपनी मर्जी स काम करइ नाही आइ अहउँ, मई तउ ओकर मरजी क पूरा करइ आइ बाटेउँ, जउन मोका हिआँ भेजे अहइ। ३९ अउर उ भेजइवाले क इच्छा इ बाटइ कि जेका जेका उ मोका सौपे अहइ, ओहमाँ म एकउ क न खोइ देउँ अउर आखिरी दिन ओनका सबका जिन्दा कइ देउँ। ४० इहइ मोरे परमपिता क इच्छा अहइ कि हर एक मनई जउन पूत क देखत ह अउर ओहमाँ बिसवास

करत ह, अनन्त जीवन पाई अउर आखिरी दिन मई ओका जियाइ देइ।”

४१ इ सुनिके यहूदियन ईसू प बड़बड़ाय लागेन, काहेकि उ कहत रहा, “मई उ रोटी अहउँ जउन सरग स उतरी अहउँ।” ४२ अउर उ पचे कहेन, “का इ यूसुफ क पूत ईसू न अहइ का हम एनके महतारी बाप क नाही जानित? फिन इ कइसे कहत बा कि ‘मई सरग स उतरा हउँ?’”

४३ एकरे जवाब मँ ईसू ओनसे कहेस, “एक दूसरे प बड़बड़ाव छोड़ द्या, ४४ मोरे लगे तब तलक कउनो नाही आइ सकत जब तक मोका भेजइवाला परमपिता ओका मोरे तरफ न खींचइ। मई आखिरी दिन ओका फिन जियाइ देब। ४५ नबियन लिखे अहइ, ‘अउर उ सब परमेस्सर दवारा सिखावा भए होइहीं।’ ४६ जउन मनई परमपिता क सुनत ह, अउर ओसे सीखत ह, मोरे पास आवत ह। मुला सच-सच जेहिका परमपिता भेजे अहइ, ओका छाँड़िके कउनो नाही लखे अहइ। परमपिता क बस उहइ लखे अहइ।

४७ “मई तोहसे सच-सच कहत बाटेउँ कि जउन मनई बिसवास करत ह उ अनन्त जीवन पावत ह। ४८ मई उ रोटी अहउँ जउन जीवन देत ह। ४९ तोहार पचेन्क पूर्वजन रेगिस्तान मँ मन्ना खाए रहेन्ह तबहू उ पचे मरि गएन। ५० इ उ रोटी अहइ जउन सरग स उतरत ह जउने कि मनई ओहमाँ स खात ह उ न मरी। ५१ जीवन क रोटी जउन सरग स उतरी अहइ, उ मई अहउँ। जउन मनई इ रोटी खाई, उ हमेसा जीवित रही, अउर जउन रोटी मई दुनिया क जिन्नगी क बरे देब, उ मोर माँस अहइ। इहइ संसार जित रही।”

५२ इ सुनिके यहूदियन आपस मँ झगड़ा करइ लागेन कि “कइसे इ मनई हम पचेन्क आपन माँस खाइ क बरे देत ह?”

५३ ईसू ओनसे कहेस, “मई तोहसे सच-सच कहत अहउँ, जब तक तू पचे मनई क पूत क माँस न खाव्या अउर ओकर लहू न पीव्या, तब तक तोहरे मँ असली जीवन नाही आई। ५४ जउन मोर माँस खात ह अउर हमार लहू पियत ह, अनन्त जीवन उहइ पावत ह अउर आखिरी दिन ओका मई फिन जीवित करि देब। ५५ काहेकि मोर माँस सब खाइवाली चीज अहइ अउर मोर लहू सच-सच

३१ मन्ना एक प्रकार क स्वर्गिक खाना जिसे परमेस्सर मूसा क समइ यहूदियन क वनवास क दिनन मँ रेगिस्तान मँ दिहे रहा।

३२ ‘परमेस्सर ... दिहेस।’ भजन. ७८ :२४

४६ :४५ अउ... होइहीं यसा. ५४ :३३.

पियइवाली चीज अहइ। ५६ जउन मोर माँस खात ह अउर मोर लहू पियत ह, उ मोरे मँ रहत ह अउर मई ओहमाँ समाइ जाइत हउँ।

५७ “इ बात बिल्कुल उहइ तरह अहइ कि जइसे जिअत-पिता मोका भेजे अहइ, अउर उहइ परमपिता क कारण मई जीवित अहउँ ठीक उहइ तरह जउन मनई खात रही, उ मोरे कारण जीवित रही। ५८ इ उहइ रोटी अहइ जउन सरग स उतरी अहइ। इ रोटी वइसे नाही अहइ जइसे मोरे पचे क पूर्वजन खाए रहेन। अउर बाद मँ उ सब मरि गएन। जउन मनई इ रोटी क खात रही, उ हमेसा जिन्दा रही।”

५९ ईसू इ सब बात कफरनहूम आराधनालय मँ सिच्छा देत कहे रहा।

अनन्त जीवन क उपदेस

६० जब ईसू क चलन क इ बात पता चली तउ उ कहेन्ह, “इ सिच्छा बहुतइ कठिन अहइ, एका कउन सुनि सकत ह?”

६१ ईसू क खुदइ पता चलि गवा रहा कि ओनके चलन क उपदेस क बारे मँ सिकायत रही। एह बरे उ ओनसे कहेस, “का इ उपदेस तोहका ठेस पहुँचावत ह? ६२ अइसी बात अहइ कि तउ तोहका अगर मनई क पूत क जहाँ उ पहिले रहा, हुवाँ फिन लौटत देखइ क पड़इ तउ का होई? ६३ आतिमा उहइ अहइ जउन जीवन देत ह। सरीर क कउनो उपयोग नाहिं बाटइ। जउन बात मई तोहसे कहे बाटेउँ, उहइ आतिमा अहइ अउर उहइ जीवन देत ह। ६४ मुला तोहरे पचे क बीच मँ कछू मनई अइसे अहइ, जउन ओहमाँ बिसवास नाही करतेन।” (ईसू तउ सुरू मँ इ जानत रहा कि उ पचे कउन मनई अहइ, जउन बिसवास नाही करत अहइ अउर उ मनई कउन वा जउन ओका धोखा देइ।)

६५ ईसू फिन कहेस, “इहइ बरे मई तोहसे कहे अहउँ, ‘मोरे पास तब तलक कउनो नाही आइ सकत जब तलक कि परमपिता ओका मोरे पास आवइ क इजाजत न देइ।”

६६ इहइ कारण रहा कि ईसू क ढेर चलन लौट गएन। अउर फिन कबहूँ ओकरे पाछे नाही चलन।

६७ फिन ईसू अपने बारहु प्रेरितन स कहेस, “का तू पचे भी जाइ चाहत अहा?”

६८ समौन परतस जवाब दिहेस, “परभू हम पचे केहिके लगे जाइ? उ सब्दन तउ तोहरे लगे अहइ

जउन अनन्त जीवन देत ही। ६९ अब हम पचे तोह पर बिसवास करित ह अउर हम जानित ह कि तू सबसे पवित्र अहा जेहिंका परमेस्वर भेजे अहइ।”

७० ईसू ओनका इ जवाब दिहेस, “का तोहका बारहु प्रेरितन का मई नाही चुने अहउँ। मुला तोहरे बीच मँ एक ठु सइतान अहइ।” ७१ उ समौन इस्करियोती क बेटवा यहूदा क बारे मँ कहत रहा, जउन ईसू क धोखा देइवाला रहा। बारहु प्रेरितन मँ उहइ एक रहा।

ईसू अउर ओकर भाइयन

७२ ओकरे बाद ईसू गलील चला गवा। उ यहूदिया मँ जात्रा न करइ का निस्चय किहेस। काहेकि यहूदी ओका मारि डावा चाहत रहेन। ७३ यहूदियन क कुटीर क त्यौहार आवइवाला रहा। ७४ बरे ईसू क भाइयन ओसे कहेन, “तोहका इ जगहा छोड़िके यहूदिया चला जाइ चाही। जइसे कि तोहार चलन तोहार अद्भुत कारजन देख पावइ।” ७५ कउनो मनई जउन सब मनइयन क बीच मँ मसहूर होइ चाहत ह, आपन कारज छिपाइ क नाही करत। तू तउ अद्भुत कारजन करत ह, इ बरे समूचे संसार मँ अपुना क परगट करा।” ७६ (ईसू क भाइयन ओहमाँ बिसवास नाही करत रहेन।)

७७ ईसू ओनसे कहेस, “मोरे बरे अबहीं तब नीक समइ नाही आवा बाटइ। मुला तोहरे बरे सबइ समइ नीक अहइ। ७८ इ दुनिया तोहसे घिना नाही कइ सकत मोसे तउ घिना करत ह। मोसे घिना करइ क कारण इ बाटइ कि मई सब क कहत फिरत हउँ, कि तोहार इ कारज बुरा अहइ, ७९ इ त्यौहार मँ तू पचे जा मई एहि बार न जाव, मोर नीक समइ अबहीं नाही आइ बाटइ।” ८० इ कहिके ईसू गलील मँ रूक गवा।

८१ तब ओकर सब भाई त्यौहार मँ चला गएन तब उहउ चला गवा। उ खुलेआम नाही गवा मुला छुप छुपके उहइ हुवाँ पहुँच गवा। ८२ यहूदी ओका त्यौहार मँ इ कहत खोजत फिरत रहेन, “उ मनई कहाँ अहइ?”

८३ ईसू क बारे मँ उ भीड़ मँ छिप छिप क तरह तरह क बातन होत रहिन। कछू मनई कहत रहेन, “उ नीक मनई बाटइ” मुला दूसर कछू मनई कहत रहेन, “नाहीं, उ तउ सबका भटकावत अहइ।”

*७ :२ कुटीर क त्यौहार इ त्यौहार हर बरिस हफता भर मनावे जात रहा, जब यहूदियन तम्बू मँ रहत भए ओन क सुमिरत रहेन जब मूसा क जमाने मँ ओनकइ पूर्वजन चालीस बरिस तलक रोगिस्तान मँ भटकत रहेन।

१३ ओकरे बारे में कउनो भी खुलिके नाही बतियात रहा, काहेकि उ पचे यहूदी क नेता स डेरार रहेन ।

यरुसलेम में ईसू क उपदेस

१४ जब उ त्यूहार करीब करीब आधा बीत गवा तब ईसू मन्दिर में गवा अउर उपदेस देव सुरू कइ दिहेस । १५ यहूदी क नेता क बहुत अचरज भवा अउर उ पचे कहेन, “इ मनई आज तक कउनो पाठसाला में पढ़इ क बरे नाही गवा, इ कइसे एँतनी गियान क बात करत बाटइ ?”

१६ एँकरे जवाब में ईसू ओनसे कहेस, “जउन सिच्छा देत अहउँ, उ मोर आपन नाही अहइ, इ हुवा स आवत अहइ, जउन मोका भेजेस ह । १७ अगर मनई उ करइ चाहत ह, जउन परमेस्सर क इच्छा अहइ, तउ उ जान जाई कि जउन सिच्छा मई देत अहउँ, उ ओकर अहइ या मई अपनी ओर स देत अहउँ १८ जउन अपनी ओर स बोलत ह, उ अपने बरे प्रसिद्धि चाहत ह, मुला सच्चा उ मनई अहइ जउन खुदइ प्रसिद्धि पावा न लइके ओका देइ क कोसिस करत ह, जउन ओका भेजे अहइ । ओहमाँ फिन कउनो तरह क खोट नाही रहत । १९ का तू पचन क मूसा व्यवस्था क दिहे अहइ ? मुला तोहरे में स कउनो ओकर पालन नाही करत । तू मोका मार डावइ क कोसिस काहे बरे करत अहा ?”

२० उ लोग इ जवाब दिहेन, “तोहरे ऊपर दुस्त आतिमा चढ़ी अहइ जउन तोहका मार डावइ क कोसिस करत बाटइ ।”

२१ एँकरे जवाब में ईसू कहेस, “मई एक चमत्कार करम करेउँ अउर तू पचे चकराइ गया । २२ इहइ कारण रहा कि मूसा तू पचन क, खतना क नियम दिहे रहा (इ नियम मूसा का नाही बरन, इ तउ तोहरे पूर्वजन स चला आवत रहा ।) अउर तू सबित क दिन लरिकन क खतना करत ह । २३ अगर सबित क दिन कउनो क खतना इ बरे करइ जात ह कि मूसा क विधान बचा रहइ, उ टूटइ न पावइ तउ तू पचे मोरे ऊपर काहे गुस्सा करत अहा कि मई सबित क दिन एक मनई क एकदम ठीक कइ दीन्ह २४ जउन बात जइसे देखात अहइ, उहइ तरह ओहपइ निआव न करइ चाही, जउन एकदम ठीक बात होइ उहइ क आधार प निआव होय चाही ।”

का ईसू ही मसीह अहइ ?

२५ फिन यरुसलेम में रहइवाले लोगन में स कछू कहेन, “का इहइ तउ उ मनई नाही अहइ जेहिका उ लोग मार डावा चाहत अहइ ? २६ मुला देखा ;

उ तउ सब मनइयन क बीच में बोलत अहइ अउर कउनो ओसे कछू नाही कहत अहइ । का इ बात नाही होइ सकत कि यहूदी नेता क पता होइ ग होइ कि इहइ मसीह अहइ । २७ खैर हम सबका तउ पता होइ ग अहइ कि इ कहाँ स आइ बाटइ । जब असली मसीह आइ जाइ तउ कउनो न जान पाइ कि उ कहाँ स आवा ।”

२५ ईसू जब मन्दिर में उपदेस देत रहा तउ बड़े जोर स कहेस, “तू पचे मोका जानत अहा अउर इहउ जानत अहा कि मई कहाँ स आएउँ । मई अपनी कइँती नाही आइ अहउँ । मई ओकरे पास स आएउँ ह जउन मोका भेजे अहइ, उहइ सच्चा अहइ, तू पचे ओका नाही जानत अहा । २६ मुला मई ओका जानत अहउँ, काहेकि मोका उहइ पठएस ।”

२७ फिन उ पचे ओका बन्दी बनाइ क जतन करइ लागेन मुला कउनो ओह पइ हाथ नाही डाइ पाएस, एह बरे कि ओकर समइ अबही पूरा नाही भवा रहा । २८ तमाम मनई ओकरे में बिसवास करइ लागेन अउर कहइ लागेन, “जब मसीह आई तउ उ जेतना अद्भुत कारजन इ करत वा ओसे जियादा उ थोड़ा कइ पाई । का उ अइसा करी ?”

यहूदियन क ईसू क बन्दी बनावइ क कोसिस

२९ फरीसियन इ सुनेन कि भीड़ में तमाम मनई चुप्पे चुप्पे ईसू क बारे में कहत रहेन्ह अउर मुख्ययाजक अउर फरीसियन मन्दिर क सिपाहियन क ईसू क गिरफ्तार करइ बरे भेजेन । ३० फिन ईसू बोला, “मई तू पचेन्क साथ कछू समी तलक अउ रहब, फिन ओकरे पास वापिस लौट जाव, जउन मोका हियाँ भेजे अहइ । ३१ तू पचे मोका ढूँढिब्या मुला ढूँढिन पउब्या । काहेकि तू पचे हुवाँ तलक न जाइ पाउब्या जहाँ मई रहब ।”

३२ एँकरे बाद यहूदी आपस में बतियाइ लागेन, “इ कहाँ जाइवाला अहइ, जहाँ हम पचे एँका न ढूँढि पाऊव । साइत ह हुवाँ तउ नाही जात अहइ जहाँ हमार मनइयन यूनानी नगरन में तितर बितर होइके रहत हीं । का इ यूनानियन में उपदेस देई ? ३३ जउन इ कहत अहइ : ‘तू मोका ढूँढिन पउब्या’ अउर ‘जहाँ मई रहब, हुवाँ तू पहुँच नाही सकत ह ।’ ओकर क मतलब अहइ ?”

ईसू पवित्र आतिमा क उपदेस दिहेस

३४ त्यूहार क आखिरी अउर जरूरी दिन ईसू ठाढ़ भवा अउर ऊँची आवाज में कहेस, “अगर कउनो पियासा अहइ तउ मोरे पास आवइ अउर

पियइ। ३५ जउन मनई मोरे मैं बिसवास करत ह, जइसा कि पवित्र सास्तर मैं लिखा अहइ, ओकरे पवित्र आतिमा स जीवन जल क नदियन फूट पड़िहई।” ३९ ईसू इ पवित्र आतिमा क बारे मैं बताए रहा। जेहिका उ पचे पइहीं जउन ओहमा बिसवास करत हीं, उ पवित्र आतिमा अबहीं तलक नाहीं दीन्ह गइ अहइ, काहेकि ईसू अबहीं तलक महिमावान नाहीं भवा अहइ।

ईसू क बारे मैं लोगन क बातचीत

४० भीड़ क कछू मनई जउन इ सुनेन तउ कहइ लागेन, “इ मनई सच मैं नबी अहइ।”

४१ कछू अउर मनई कहत रहेन, “इहइ मनई मसीह अहइ।”

कछू अउर मनई कहत रहेन, “मसीह गलील स न आई। का इ होइ सकत ह? ४२ का पवित्र सास्तर मैं नाहीं लिखा अहइ कि मसीह दाऊद क लरिका होई अउर बैतलहम स आई जउने सहर मैं दाऊद रहत रहा।” ४३ एह तरह स ईसू क मनइयन मैं सब मनइयन क बीच मैं फूट पड़ि गइ। ४४ कछू लोग ओका बन्दी बनावा चाहत रहेन मुला कउनो ओकरे प हाथ नाहीं डाएन।

यहूदी नेतन क अबिसवास

४५ इ बरे मन्दिर क सिपाही मुख्ययाजक अउर फरीसियन क पास लौट आएन। एहि पइ ओनसे पूछा गवा, “तू ओका पकरिके काहे नाहीं लाया?”

४६ सिपाहियन क जवाब रहा, “कउनो मनई आज तक अइसे नाहीं बोला, जइसे उ बोलत ह।”

४७ एहि पइ फरीसियन ओनसे कहेन, “का तू पचे भरमाइ ग अहा? ४८ कउनो यहूदी नेता या फरिसियन ओकरे मैं कबहुँ बिसवास नाहीं करे अहई। ४९ मुला जउन मनइयन क व्यवस्था क जानकारी नाहीं अहइ, परमेस्वर ओनका सराप देत ह।”

५० नीकुदेमुस ओनसे कहेस इ उहइ रहा जउन पहिले ईसू क पास गवा रहा, इ ओन फरीसियन मैं स एक ठु अहइ, ५१ “हमार व्यवस्था क तब तलक कउनो क दोखी नाहीं ठहरावत जब तलक ओका सुनि नाहीं लेत अउर इ पता नाहीं लगाइ लेत कि उ कउन करम करे अहइ।”

५२ एकरे जवाब मैं उ पचे ओसे कहेन, “का तू भी गलील क अह्या? सास्तर क पढ़े स पता चलत ह कि गलील स कउनो नबी कबहुँ नाहीं आई।”

(कछू यूनानी प्रतियन मैं यूहन्ना ७ : ५३-८ : ११ पद नाहीं अहई।)

दुराचारी स्त्री स क छमा

५३ फिन उ पचे हुवाँ स अपने घर चला गएन।

१ अउर ईसू जैतून पर्वत प चला गवा।

५४ एकदम सबेरे उ फिन मन्दिर मैं गवा। सब मनई ओकरे पास आएन। ईसू बइठके ओनका सबेन्हका उपदेस देइ लाग।

५५ तबहीं धरम सास्त्री अउर फरीसी लोग व्यभिचार क अपराध मैं एक ठु स्त्री क पकरि लइ आएन। अउर ओका सबके सामने टाढ़ करि दिहेन्ह। ५६ अउर ईसू स कहेन्ह, “हे गुरू, इ स्त्री व्यभिचार करत रंग हाथ पकड़ी गइ अहइ। ५७ मूसा क व्यवस्था हमका पचेन्ह क आदेस देत ह क अइसी स्त्री क पाथर मारइ चाही। अब बतावा तोहार क कहव अहइ?”

५८ ईसू क अजमावइ क बरे उ सबेन्ह पूछत रहेन्ह जइसे कि ओनका सबन्क ओकरे खिलाफ कउनो अभियोग लगावा जाइ सकइ। मुला ईसू नीचे झुका अउर अपनी अंगुरी स जमीन प लिखइ लाग। ५९ यहूदी नेता पूछत जात रहेन्ह, इ बरे ईसू सोझ सोझ तनि क टाढ़ि होइ गवा अउर ओनसे कहेस, “तोहरे सब मैं स जउन मनई पापी न होइ, सबसे पहिले उहइ इ स्त्री क पाथर मारइ।” ६० अउर फिन उ झुक कर जमीन प लिखइ लाग।

६१ जब सब मनई इ सुनेन्ह तउ सबसे पहिले बुढ़वा मनइयन अउर फिन एक एक कइके हुवाँ स खिसकइ लागेन अउर हुवाँ अकेले ईसू बचा रहा। ईसू क सामने उ स्त्री अबहीं तलक टाढ़ि रही। ६२ ईसू खड़ा भवा अउर उ स्त्री स कहेस, “ऐ स्त्री, उ पचे कहाँ चला गएन। का तोहका कउनो दोखी नाहीं ठहराएस?”

६३ उ स्त्री बोली, “नाहीं महासय! कउनो नाहीं।”

ईसू कहेस, “मइ भी तोहका दण्ड न देव। जा अउर अब फिन कबहुँ पाप न करिउ।”

दुनिया क ज्योति ईसू

६४ फिन हुवाँ मौजूद मनइयन स ईसू कहेस, “मइ दुनिया क ज्योति अहउँ, जउन मोरे पाछे चलत ह, उ कबहुँ अंधेरे मैं नाहीं रहत। ओका तउ उ ज्योति मिली जउन जीवन देत ह।”

६५ इ सुनिके फरीसियन ओनसे कहेन, “तू आपन साच्छी सुदइ देत अहा, इ बरे तोहार साच्छी न मानी जाई।”

६६ एकरे जवाब मैं ईसू ओनसे कहेस, “जदि मइ आपन साच्छी अपनी कइती स आप देत अहउँ,

तबहूँ मोर साच्छी सही अहइ, काहेकि मई इ जाना चाहित ह, कि मई कहाँ स आवा अहउँ अउर कहाँ जात अहउँ।^{१४} तू पचे मनइयन क बनाए नेमन प निआव कहत ह, मई कउनो क निआव नाही करत अहउँ।^{१५} जदि मई निआव करी तउ मोर निआव उचित होइ। काहेकि मई अकेलि नाही अहउँ, बल्कि परमपिता जउन मोका हियाँ भेजे अहइ, दुइनउँ मिलके निआव करित ह।^{१६} तोहरे व्यवस्था में लिखा अहइ कि दुइ मनइयन क साच्छी सच्ची होत ह।^{१७} मई आपन साच्छी खुदइ देत अहउँ अउ परमपिता, जउन मोका भेजे अहइ, मोरी ओर स साच्छी देत ह।^{१८}

^{१९} इ सुनिके उ सब मनइयन ओसे कहेन, “तोहार परमपिता कहाँ अहइ?” ईसू जवाब दिहेस, “न तउ तू पचे मोका जानत अहा अउर न तउ मोरे परमपिता क। जदि तू मोका जानत होत्या, तउ मोरे परमपिता क जानि लेत्या।”^{२०} मंदिर मँ उपदेस देत भए जउन मनई भेंट पातरन क पास रहेन, ओनसे इ बात ईसू कहेस। मुला कउनो ओका बन्दी नाही बनाएस, काहेकि ओकर समइ अबहीं नहीं रहा।

यहूदियन क ईसू क बारे मँ अगियान

^{२१} ईसू ओनसे एक बार फिन कहेस, “मई चला जाब अउर तू पचे मोका खोजब्या। मुला तू पचे अपने पापन क कारण मरि जाब्या। जहाँ मई जात अही तू पचे हुँवा नाही आइ सकत ह।”

^{२२} फिन यहूदी कहइ लागेन, “का तू इ सोचत अहा। कि उ खुदकुसी करइवाला अहइ? काहेकि उ कहेस ह, ‘तू पचे हुवाँ नाही आइ सकत ह जहाँ मई जात अहउँ।’”

^{२३} एह पइ ईसू ओनसे कहेस, “तू पचे नीचे क अहा अउर मई ऊपर स आवा हउँ, तू पचे संसारिक अहा अउर मई इ दुनिया मँ नाही हउँ।^{२४} इ बरे मई तू सबन स कहत हउँ तू पचे अपने पाप मँ मरि जाब्या। जब तू बिसवास नाही करत अहा कि उ मई अहउँ। तउ तू अपने पाप मँ मरि जाब्या।”

^{२५} उ पचे ईसू स फिन पूछेन, “तू कउन अह्या?”

ईसू ओनका जवाब दिहेस, “मई उहइ अहउँ, जइसे कि सुरूआत मँ मई तोहका बताए रहेउँ।^{२६} तू पचेन्क बतावइ क बरे अउर तू पचन क निआव करइ क मोरे पास बहुत कछू अहइ। मुला सच्ची बात इ अहइ कि सत्य उहइ अहइ जउन मोका भेजेस। मई उहइ बतावत अही जउन मई ओसे सुने अहउँ।”

^{२७} उ पचे इ नाही जान पाएन्ह कि ईसू ओनका परमपिता क बाबत बतावत अहइ।^{२८} फिन ईसू ओनसे कहेस, “जब तू मनई क पूत क ऊँचा उठाय लेब्या तू जान लेब्या कि उ मई अहउँ। मई अपनी ओर स कछू नाही करत अहउँ। मई जउन करत अहउँ, इ उहइ अहइ जउन मोका परमपिता सिखाए अहइ^{२९} अउर उ जउन मोका इहाँ भेजेस, उ मोरे साथ अहइ। उ कबहूँ मोका अकेले नाही छोड़ेस, इ बरे कि मई उहइ कारज करित ह जइसा उ चाहत ह।”^{३०} ईसू जब इ बात बतावत रहा, तउ बहुत मनई ओकर बिसवासी होइ गएन।

पाप स छुटकार पावइ क उपदेस

^{३१} ईसू ओन यहूदियन क बतावइ लाग, जउन ओहमाँ बिसवास करत रहेन, “जब तू पचे मोरे उपदेस प चलब्या तउ तू मोर सच्चा चलन बन जाब्या।^{३२} अउर सच्चाई क जान लेब्या। अउर सच्चाई तोहका मुक्ति दइ देइ।”

^{३३} इ सुनिके उ सबेन्ह ईसू स पूछेन, “हम सब इब्राहीम क खानदान क अही अउर हम सबे आज तक केहू क गुलामी नाही कीन्ह। फिन तू कइसे कहत अहा कि तू पचे छुटकारा पाइ जाब्या?”

^{३४} ईसू ओनका इ जवाब दिहेस, “मई तोहसे सच्चाई का बखान करत अहउँ। जउन मनई पाप करत रहत ह, पाप क दास अहइ।^{३५} अउर कउनो दास परिवार के साथे नाही रहि सकत। केवल पूत हमेसा परिवार क साथे रहत ह।^{३६} इ बरे अगर पूत तोह सबन क छुटकारा देइ सकत ह, तउ तू पचे जरूर छुटकारा पाय जाब्या। मई जानत अहउँ तू इब्राहीम क खानदान क अह्या।^{३७} मुला तू पचे मोरा मारि डावइ क कोसिस करत अहा। काहेकि तू पचे मोरा उपदेस नाही मनत्या।^{३८} मई उहइ बतावत अहउँ, जउन मोर परमपिता मोका देखोएस अउर तू उहइ करत अहा। जउन तोहार पिता तोहका करइ क बताएस ह।”

^{३९} इ सुनिके उ पचे ईसू क जवाब दिहेन, “हमरे पिता इब्राहीम अहीं।”

ईसू कहेस, “जब तू इब्राहीम क सन्तान होत्या, तउ तू उहइ कारज करत्या जउन कारज इब्राहीम करत रहा।^{४०} मुला तू पचे तउ मोर जइसे मनई का जउन परमेस्वर स सुनि सच्चाई का बतावत अहइ, मारि डावा चाहत अहा। इब्राहीम तउ अइसा कबहूँ नाही किहेस।^{४१} तू पचे अपने पिता क काम करत अहा।”

फिन उ सबेन्ह ईसू स कहेन, “हम सबन उ सबइ गदेलन क तरह नाही जउन व्यभिचार क सुरूप

पड़दा भएन ह। हमार केवल एक पिता अहइ, उ अहइ परमेस्सर।”

४२ ईसू ओनका जवाब दिहेस, “जदि परमेस्सर तोहार पिता होतइ तउ तू पचे मोका पियार करत्या, काहेकि मई ही परमेस्सर क पास स आइ अहउँ। अउर अबहीं मई हियाँ अहउँ। मई अपने आप हियाँ नाही आइ बाटी, बल्कि मोका परमेस्सर भेजेस।” ४३ जउन कछू मई बतावत अहउँ ओका तू सबेन्ह काहे नाही समझत अहा? एकर कारण इ अहइ कि तू मोर उपदेस नाही स्वीकार करत अहा। ४४ तू सबेन्ह अपने पिता सइतान क सन्तान अह्या अउर तू सबेन्ह अपने पिता क इच्छा प चलइ चाहत अहा। उ सुरुआतइ स एक हत्यारा रहा अउर सच्चाई क तरफदारी कबहू नाही करेस। काहेकि ओहमाँ सच्चाई क कउनो हिस्सा नाही रहा। जब उ झूठ बोलत ह तउ सहल भाव स बोलत ह, काहेकि उ झूठा अहइ अउर तमाम झूठ क पड़दा करत ह।

४५ “मुला मई सच्ची बात कहत अहउँ, तू सबेन्ह इ बरे मोहमाँ बिसवास नाही करत अहा। ४६ तोहरे मँ स कउन अइसा मनई अहइ जउन मोरे ऊपर लगावा पाप सिद्ध कइ सकत ह। जदि मई सत्य कहत अहउँ तउ तू मोर बिसवास काहे बरे नाही करत अहा? ४७ जउन मनई परमेस्सर क अहइ, परमेस्सर क वचन क सुनत ह। तू सबेन्ह मोर बात नाही सुनत अहा, इ बरे कि तू सबेन्ह परमेस्सर क नाही अह्या।”

ईसू अपने बाबत अउर
इब्राहीम क बाबत बताएस

४८ ईसू क बात क जवाब मँ यहूदियन ईसू स कहेन, “का हमार सबेन्ह क इ बात सच्ची न अहइ कि तू सामरी अह्या अउर तोहरे ऊपर कउनो दुस्ट आतिमा सवार अहइ?”

४९ ईसू जवाब दिहेस, “मोरे ऊपर कउनो दुस्ट आतिमा सवार नाही अहइ। मई तउ अपने परमपिता क आदर करित ह, मुला तू पचे मोर अपमान करत अहा। ५० मई आपन महिमा नाही चाहत अहउँ मुला एक ठु अइसा अहइ जउन मोर महिमा चाहत ह अउर निआव करत ह। ५१ मई तोहका सच्ची बात कहत अहउँ कि जउन मनई मोरे उपदेस क अनुसरण करी उ मउत क कबहू न देखी।”

५२ इ सुनिके यहूदियन ओसे कहेन, “अब हम पचे जानि गए कि तोहरे अन्दर कउनो दुस्ट आतिमा समाइ गइ अहइ। हियाँ तक कि इब्राहीम अउर

नबी दुइनउँ मरि गएन मुला तू कहत अहा कि जउन मनई तोहार उपदेस प चली ओकर कबहू मउत न होई। ५३ एहमाँ कउनो सक नाही अहइ कि तू मोरे पिता इब्राहीम स बड़ा नाही अहा जउन कि मर गवा। अउ नवियन क मउत होइ गइ। मुला तू पता नाही का सोचत अहा? तू अह्या के?”

५४ ईसू जवाब दिहेस, “जदि मई अपनी महिमा क बखान करी, तउ ऊ मोर महिमा कछू न अहइ। जउन मोका महिमा देत ह, उ मोर परमपिता अहइ। जेकरे बारे मँ तू दावा करत अहा कि उ तोहार परमेस्सर अहइ। ५५ तू पचे ओका कबहू नाही जनत्या। मुला मई ओका जानत अहउँ जब मई कहउँ कि मई भी ओका नाही जानत अहउँ तउ तोहरे सबेन्ह क तरह मई भी झूठा होइ जाव। मई ओका अच्छी तरह स जानित ही अउर जउन उ कहत ह ओका पालन करित ही। ५६ तोहार पिता इब्राहीम इ जानिके कि उ अइसा दिन देखी जब मई आउव, तउ उ आनन्द स भरि भवा रहा : उ एका देखेस अउर बहुत खुस भवा।”

५७ फिन यहूदियन ओसे कहेन, “तू अबहीं पचास बरिस क भी नाही अहा अउर तू इब्राहीम क लखि लिहा।”

५८ ईसू एकरे जवाब मँ कहेस, “मई तोहका सत्य बतावत अहउँ कि इब्राहीम स पहले भी मई रह्यो, मई अहउँ।” ५९ इ सुनिके उ सबेन्ह ईसू क मारइ क बरे बड़ा बड़ा पाथर उठाइ लिहन मुला ईसू लुकत छिपत मन्दिर स चला गवा।

पैदाइसी आँधर क आँखी देब

१ जब उ सबेनह जात रहेन तउ उ एक ठु पैदाइसी आँधर मनई क देखेस। २ इ देखि क ईसू क चेलन ओसे पूछेन, “गुरू, इ मनई आँधर पैदा भवा ह मूला केकरे पाप क कारण उ आँधर भवा ह अपने पाप या अपने महतारी बाप क?”

३ ईसू जवाब दिहेस, “न तउ इ कउनो पाप करे अहइ अउर न एकर महतारी बाप कउनो पाप करे अहइ। इ एह बरे आँधर पैदा भवा अहइ जइसे कि एका नीक कइके परमेस्सर क ताकत देखाई जा सकइ। ४ ओकर काम जउन मोका भेजे अहइ, दिन रहतइ कइ लेइ चाही, काहेकि जब रात होइ जाइ तउ कउनो काम नाही होइ पावत। ५ जब तलक मई इ दुनियाँ मँ अहइ तब तलक मई दुनिया क ज्योति अहउँ।”

६ एतना कहिके ईसू जमीन प थूकेस अउर ओसे थोरि क माटी सानेस ओका आँधर मनई क आँखी प मल दिहेस। ७ अउर ओसे कहेस, “जा अउर

सीलोह क पोखरा मैं धोइ आवा।” (सीलोह क मतलब अहइ “भेजा भवा।”) अउर फिन उ आँधर जाइके आपन आँखी धोइ आवा। जब उ लौटा तउ ओका देख्वाइ देइ लाग।

८ फिन ओकर पड़ोसी अउर उ लोग जउन ओका भीख माँगत देखत रहेन, कहेन, “का इ उहइ मनई अहइ जउन बइटे-बइटे भीख माँगत रहा ?”

९ कछू लोग कहेन, “इ उहइ अहइ।” दूसर लोग कहेन, “नाहीं, इ उ मनई न अहइ, उहइ क तरह देख्वात अहइ।” इ सुनिके आँधर मनई कहेस, “मई उहइ अहउँ।”

१० इ देखिके उ सबेन्ह ओसे पूछेस, “तोहका आँखी क प्रकास कइसन मिली ?”

११ उ जवाब दिहेस, “ईसू नाउँ क एक मनई माटी सानके मोरी आँखी प मलेस अउ मोसे कहेस, जा अउर सीलोह मैं धोइ आवा अउर मई जाइके धोइ आएउँ। मोका उहइ वजह स आँखन क प्रकास मिल गवा।”

१२ फिन उ सबेन्ह ओसे पूछेन, “उ कहाँ अहइ ?” उ जवाब दिहेस, “मोका पता नाहीं अहइ।”

आँखी क दान क बावत
फरीसियन मैं आपसी झगड़ा

१३ उ मनई जउन पहिले आँधर रहा, उ सबेन्ह ओका फरीसियन क पास लइ गएन। १४ जउने दिन ईसू, माटी सानके अँधरे क आँखी क प्रकास दिहे रहा। उ सबित क दिन रहा। १५ एँह तरह फरीसियन ओसे एक बार फिन पूछइ लागेन, “उ अपने आँखिन क प्रकास कइसे पाएस ?”

उ बताएस, “उ मोरी आँखी प गीली माटी लेपेस अउर मोसे कहेस, जा धोइ ल्या, मई धोइ लीन्ह अउर अब देख सकित हउँ।”

१६ कछू फरीसी कहइ लागेन, “इ मनई परमेस्सर क तरफ स न अहइ, एह बरे कि इ सबित क पालन नाहीं करत।”

एक क सुनिके दूसर मनई बोलेन, “कउनो पापी मनई भला एतना अद्भुत कारजन कइसे कइ सकत ह ?” इ तरह स ओनके बीच मैं आपस मैं मतभेत होइ लाग।

१७ फिन यहूदी नेतन उ आँधर मनई स बोलेन, “ओकरे बावत तू का कहत अहा ? एह बरे कि तू जानत अहा कि उ तोका आँखी दिहे अहइ।”

तब उ कहेस, “उ नवी अहइ।”

१८ यहूदी नेतन ओह समइ तक ओकरे ऊपर बिसवास नाहीं करत रहेन, कि उ मनई आँधर रहा अउर ओकरे आँखिन का प्रकास मिल गवा। जब

तक ओकरे महतारी बाप क बोलाइके ? उ पचे इ नाहीं पूछ लिहेन कि, “का इ तोहार बेटवा अहइ जेकरे बारे मैं तू कहत अहा कि वह आँधर रहा। फिन इ कइसे होइ सकत ह कि अब उ देख सकत ह ?”

२० इ सुनिके ओकर महतारी बाप जवाब देत कहेन, “हम जानित ह कि हमार बेटवा अहइ अउर हमार बेटवा पैदाइसी आँधर रहा। २१ मुला हम इ नाहीं जानित कि अब उ कइसे देख सकत ह अउर न तउ हम इ जानित थी कि एका आँखिन मैं प्रकास के दिहेस। अब इहइ स पूछा, इ काफी बड़ा होइ गवा अहइ। अपने बावत इ खुदइ बताय सकत ह।” २२ ओकर महतारी बाप इ बात इ बरे कहे रहेन कि उ यहूदी नेतन स डेरात रहेन। काहेकि उ पहिले स निस्वय कइ चुका रहेन कि जउन मनई ईसू क मसीह मानी तउ ओका आराधनालय स निकार दीन्ह जाई। २३ इ बरे ओकर महतारी बाप कहेन, “उ काफी बड़ा होइ गवा उहइ स पूछा।”

२४ यहूदी नेतन उ मनई क जउन आँधर रहा दूसरी बार बोलाएन, अउर कहेन, “सही सही बोल, अउर जउन तू नीक होइ ग अहा ओकर महिमा परमेस्सर क द्या। हमका पता अहइ कि इ मनई पापी अहइ।”

२५ इ सुनिके उ जवाब दिहेस, “मई इ नाहीं जानित कि उ पापी अहइ कि नाहीं, मई तउ इहइ जानित ह कि मई आँधर रहेउँ अउर अब मई देख सकित ह।”

२६ इ सुनिके उ सबइ ओसे पूछेन, “उ तोहका का किहेस ? उ तोहका कइसे आँखी दिहेस ?”

२७ उ मनई ओन सबेन्ह क जवाब दिहेस, “मई तउ तोहका बताय चुका अहउँ मुला तू मोर बात सुनतइ नाहीं अहा। तू फिन स काहे उहइ बात सुना चाहत अहा ? का तू ओकर चलन बना चाहत अहा ?”

२८ इहइ बात प उ पचे ओकर बेइज्जती करेन अउर कहेन, “तू ओकर चेला अहा अउर हम सबेन्ह मूसा क चलन अही। २९ हम सब जानित ही कि परमेस्सर मूसा स बतियात रहा, मुला हम सबेन्ह इ नाहीं जानित कि इ मनई कहाँ स आइ बाटइ ?”

३० एकर जवाब देत उ मनई ओनसे कहेस, “बड़ी अचरज की बात अहइ कि तू सबेन्ह इ नाहीं जानत अहा कि उ कहाँ स आइ बाटइ ? मुला मोका आँखिन क प्रकास उहइ दिहेस। ३१ हम पचे जानित ह कि परमेस्सर पापियन क नाहीं सुनत, उ तउ ओनकइ सुनत ह जउन समर्पित अहइ अउर

उहइ परमेस्सर क जउन इच्छा रहत ह, उहइ करत ह।^{३२} आज तलक इ कबहूँ सुना नाही ग रहा कि कउनो आँधरे मनई क कहूँ आँखी क प्रकास दिहे रहा। होइ।^{३३} जब मनई परमेस्सर क तरफ स नाही आइ अहइ तउ उ इ सब कछु नाही कइ सकत।”

^{३४} एकरे जवाब मँ उ सबइ कहेन, “तू हमेसा स पापी रह्या, जब स तोहार जनम भवा। अउर आज तू हम सबका सिखावइ चला अहा?” इ कहिके यहूदी नेतन ओका धकियाइके बाहेर निकार दिहेन।

आतिमा का आँधर होव

^{३५} ईसू इ सुनेस कि यहूदी नेतन ओका धकियाइके बाहेर निकार दिहेन तउ ओसे मिलके उ कहेस, “का तू मनई क पूत मँ बिसवास करत ह?”

^{३६} एकरे जवाब मँ उ मनई बोला, “हे परभूँ, इ बतावा कि मनई क पूत कउन अहइ? इ बरे कि मई ओकरे मँ बिसवास करइ लागऊँ।”

^{३७} ईसू ओहसे कहेस, “तू ओका लखि चुका अह अउर उ उहइ मनई अहइ जेहसे तू इ समइ बात करत अहा।”^{३८} फिन उ कहेस, “परभूँ, मई बिसवास करित हउँ।” अउर उ फिन ओकरे सामने ओनके गोड़वा पइ गिर गवा।^{३९} ईसू कहेस, “मई इ दुनिया मँ निआव करइ क बरे आइ अहउँ, जइसे कि जउन देखि नाही सकत अहइ, उ देखइ लागइ अउर जउन देखत अहइ, उ सबइ आँधर होइ जाई।”

^{४०} कछु फरीसी जउन ईसू क साथे रहेन, इ सुनिके ईसू स कहेन, “हम सब जरूर आँधर नाही अही। का हम पचे आँधर अही?”

^{४१} ईसू ओनसे कहेस, “जदि तू आँधर होत्या तउ तू पापी न होत्या मुला जइसे तू सबेन्ह कहत अहा कि देख सकत अहा, इ बरे तू सबेन्ह जरूर पापी अहा।”

चरवाहा अउर ओकर भेड़ी

१० ईसू कहेस, “मई तोहसे सच्ची बात बतावत अहउँ कि जउन मनई भेड़िन क बाड़े मँ दरवाजा स न घुसिके कउनो अउर रस्ते स घुसत ह तउ, उ चोर अहइ, लुटेरा अहइ।^१ मुला जउन मनई दरवाजे स घुसत ह, उ भेड़िन क चरवाहा अहइ।^२ दरवाजे क रखवाला ओकरे बरे दरवाजा खोल देत ह, अउर भेड़िन क ओकर आवाज सुनत ही। अपनी भेड़िन क नाउँ लेइ लेइ पुकारत ह अउर ओनका बाड़े स बाहर

निकारत ह।^४ जब उ आपन सब भेड़ निकार लेत ह तउ ओनके आगे-आगे चलत ह अउर भेड़िन सब ओका पिछुआय लेति हीं, काहेकि उ ओकर आवाज पहिचानात हीं।^५ भेड़ कबहूँ कउनो अजनबी मनई क नाही पिछुआय लेतिन। ओसे उ दूर भागत हीं, काहेकि उ अजनबी क आवाज नाही पहिचनतिन।”

^६ ईसू नजीर देइके ओनका सबका समझावा चाहत रहा, मुला ओन सबकी समझ मँ इ बात नाही आइ कि ईसू ओनका बतावत अहइ।

ईसू नीक चरवाहा

^७ तब ईसू ओनसे फिन कहेस, “मई तोहका सच्ची सच्ची बात बतावत अहउँ, कि भेड़िन क बरे दरवाजा मई अहउँ।^८ उ सबेन्ह जउन मोसे पहिले आइ रहेन, चोर अउर लुटेरा अहइ। मुला भेड़िन ओनके बात नाही सुनिन।^९ मई दरवाजा अहउँ। जदि कउनो मोसे होइके भीतर घुसइ चाहत ह, तउ ओकर बचाव होइ, उ अन्दर जाइ सकत ह अउर बाहर जाइ सकत ह अउर ओका चारागाह मिल जाई।^{१०} चोर केवल चोरी करइ क बरे, कतल करइ क बरे अउर सत्यानास करइ क बरे आवत ह। मुला मई इ बरे आइ अहउँ कि सब मनई भरपूर जिन्नगी पाइ सकइ।

^{११} “मई अच्छा चरवाहा अहउँ। नीक चरवाहा भेड़िन क बरे आपन जान तक देइ देत ह।^{१२} मुला जउन केराए क मजदूर होत ह, उ चरवाहा न होइ क कारण, भेड़िया क आवत देखिके भेड़िन क छौँडिके भाग जात ह, काहेकि उ भेड़ ओकर तउ रहत नाही। भेड़िया ओनके ऊपर हमला कइके ओनका छितराय देत ह।^{१३} इ बरे भाग जात ह, काहेकि उ रोजमर्रा की मजूरी पर काम करत ह अउर ओका भेड़िन क गिन क कउनो परवाह नाही रहत।

^{१४-१५} “मई नीक चरवाहा अहउँ। आपन भेड़िन क मई जानित ह अउर मोर भेड़िन मोका वइसे जानत हीं, जइसे परमपिता मोका जानत ह अउ मई परमपिता क जानित ह। अपनी भेड़िन क बरे मई आपन जान दइ देइत हउँ।^{१६} मोर अउर भेड़िन अहइ जउन इ बाड़ा क न अही। मोका ओनहूँ क लियावइ क अहइ। ओनहूँ मोर आवाज सुनिहइ अउर इहइ बाड़ा मँ आइके एकट्ठी होइ जइहीं। फिन एक भेड़िन क समूह क एक चरवाहा रही।^{१७} परमपिता मोसे इहइ बरे पिरम करत ह काहेकि मई आपन जान देइ देइत ह। मई आपन जिन्नगी इ बरे दइ देइत ह जइसे मई एका फिन पाइ जाई।

कउनो हमसे एँका लइ नाहीं लेत १८ मइँ खुदइ अपनी इच्छा स एँका दइ देइत ह। मोका एँका फिन वापस लेइ क अधिकार भी अहइ। इ आदेस मोका परमपिता स मिला अहइ।”

१९ एन सब्दन सुनिके यहूदियन मँ फिन स फूट पैदा होइ गइ। २० बहुत इ कहइ लागेन, “इ तउ पगलाइ गवा अहइ। एकरे ऊपर कउनो बुरी दुस्ट आतिमा सवार अहइ। तू सबेन्ह काहे बरे एका सुनत अहा।”

२१ दूसर कछू मनई कहइ लागेन, “इ सब्दन अइसे मनई क नाहीं होइ सकत जेकरे ऊपर दुस्ट आतिमा सवार होइ। कउनो दुस्ट आतिमा कबहूँ कउनो आँधर क आँखी नाहीं दइ सकत।”

यहूदियन ईसू क विरोध करत हीं

२२ फिन यरुसलेम मँ समर्पण क त्यौहार १ आइ गवा। जाड़ा का दिन रहा। २३ ईसू मन्दिर मँ सुलैमान क दलान मँ ठहरत रहा। २४ उहइ समइ यहूदियन ओका घेर लिहेन अउर कहेन, “तू हमका सबेन्ह का कब तलक परेसान करत रहब्या? जदि तू मसीह अह्या तउ साफ साफ बतावा।”

२५ ईसू जवाब दिहेस, “मइँ तोहका बताइ चुका अहउँ अउर तू बिसवास नाहीं करत अहा। उ सबइ काम जउन मइँ पिता क नाउँ प करत अहउँ, खुदइ मोर साच्छी अहइ। २६ मुला तू सबेन्ह बिसवास नाहीं करत अहा, काहेकि तू पचे मोरी भेड़िन मँ स न अह्या। २७ मोर भेड़ मोर आवाज पहिचानत हीं अउर मइँ ओनका जानित अहउँ। उ सबइ मोरे पीछे पीछे चलत हीं अउर मइँ ओनका पहिचानित ह। २८ उ सबइ मोरे पीछे पीछे चलत थीं अउर मइँ ओनका अनन्त जीवन देइत ह। ओनकइ कबहूँ नास नाहीं होतइ, अउर न तउ केहू ओनका मोसे छीन पाई। २९ मोर परमपिता ओन सबन क दिहे अहइ, जउन सबसे महान अहइ। ओनका मोरे परमपिता स कउनो भी नाहीं छीन सकत। ३० मोर परमपिता अउर मइँ दुइनउँ एक अही।”

३१ फिन यहूदियन ईसू क मारइ क बरे पाथर उठाइ लिहन। ३२ ईसू ओनसे कहेस, “अपने परमपिता क तरफ स मइँ तू पचे क बहुत नीक नीक कारज देखाएउँ। ओहमाँ स कउने काम क एवज मँ तू सबेन्ह मोका पत्थर मारइ चाहत अहा?”

३३ यहूदियन जवाब दिहेन, “हम पचे तोहरे ओन सभी नीक काम बरे पाथर नाहीं मारत अही, मुला

इ बरे अइसा करत अही कि तू परमेस्सर क अपमान करे अहा अउर मनई होत भए खुदइ क परमेस्सर कहत अहा।”

३४ ईसू जवाब दिहेस, “का इ तोहरे व्यवस्था मँ नाहीं लिखा अहइ, ‘मइँ कहेउँ कि तू सब जने परमेस्सर अह्या?’ ३५ का हियाँ परमेस्सर ओनका नाहीं कहा ग अहइ जेनका परमेस्सर क सन्देस मिल चुका बाटइ? (अउर पवित्र सास्तर क बात काटी नाहीं जाइ सकत) ३६ का तू परमेस्सर क अपमान करत अहा ओकरे बरे कहत अहा, जेका परमपिता इ दुनिया मँ अर्पण कइके भेजे अहइ, केवल इ बरे कि मइँ इ कहेउँ, ‘मइँ परमेस्सर क पूत अहउँ?’ ३७ जदि मइँ अपने परमपिता क कारज नाहीं करत अहउँ तउ मोर बिसवास जिन करा, ३८ मुला जदि मइँ अपने परमपिता क कारज करत अहउँ, अउर तू मोर बिसवास नाहीं करत अहा, तउ मोरे कारण बिसवास करा जइसे कि तू इ जानि सका कि पिता मोरे अन्दर अहइ अउर मइँ अपने पिता मँ अहउँ।”

३९ इ सुनि क यहूदी एक बार फिन ओका बन्दी बनावइ क कोसिस किहेन मुला ईसू ओनके हाथ स निकरि गवा।

४० ईसू फिन हुआँ स हट कर यरदन क दूसरे पार उ जगह चला गवा जहाँ प यूहन्ना बपतिस्मा देत रहा। ईसू हुवाँ ठहरा, ४१ तमाम मनई ओकरे पास आएन अउर कहइ लगेन, “यूहन्ना कउनो अद्भुत कारज नाहीं करेस मुला इ मनई क बारे मँ जउन कछू कहे रहा, उ बिल्कुल सही निकरा।” ४२ फिन हुवाँ तमाम मनई ईसू मँ बिसवास करइ लागेन।

लाजर क मउत

१ बैतनिय्याह क लाजर नाउँ क एक ठु मनई बीमार रहा। इ उहइ सहर रहा जहाँ प मरियम अउर ओकर बहिन मार्था रहत रहिन। २ (मरियम उ स्त्री रही जउन पभू क ऊपर, इतर डाए रही अउर अपने मूँडे क बारे स ओकर गोड़ पोछे रही। लाजर नाउँ क रोगी ओकर भाई रहा।) ३ इ बहिनियन ईसू क लगे समाचार भेजे रहिन, “पभू, जेहिका तू मया करत अहा उ बीमार अहइ।” ४ ईसू जब इ सुनेस तउ बोला, “इ बीमारी जान लेवा नाहीं अहइ। इ तउ परमेस्सर क महिमा परगट करइ क बरे अहइ। इहइ स परमेस्सर क पूत क महिमा मिली।” ५ (ईसू मार्था ओकर बहिन

११० :२२ समर्पण क त्यौहार समर्पण क त्यौहार दिसम्बर क एक ठु खास हफ्ता जेका यहूदी मानत हीं।

११० :३४ मइँ ... अह्या” भजन. ८२ :६.

अउर लाजर क पियार करत रहा) ६ इ बरे जब उ सुनेस कि लाजर बीमार होइ गवा अहइ, तब जहाँ उ ठहरा रहा, हुवाँ दुइ दिन अउर रूक गवा। ७ फिन ईसू अपने चेलन स कहेस, “आवत जा हम सब यहूदिया लौटि चली।”

८ इ सुनिके ओकर चेलन कहेन, “गुरू कछु दिन पहले यहूदी नेता तोहरे ऊपर पथराव करइ क कोसिस करे रहेन अउर तू फिन हुवाँ जात अहा?”

९ ईसू जवाब दिहेस, “का एक दिन मँ बारह घंटा नाहीं होतैन। जब कउनो मनई दिन क रोसनी मँ चलत ह तउ उ ठोकर नाहीं खात, काहेकि उ इ दुनिया क रोसनी क देखत ह। १० मुला जदि कउनो रात मँ चलत ह तउ ठोकर खाइ क गिर जात ह, काहेकि रोसनी नाहीं रहत।”

११ उ फिन इ कहेस, “अउर ओनसे बोला, हमार मीत लाजर अबहीं सोवत अहइ मुला मई ओका जगावइ जात अहउँ।”

१२ फिन ओकर चेलन ओसे कहेन, “पभू, जदि ओका नीद आइ ग अहइ तउ उ नीक होइ जाई।”

१३ ईसू लाजर क मउत क बाबत बतावत रहा मुला ओकर चेलन सोचेन कि उ प्राकृतिक नीद क बारे मँ कहत बाटइ। १४ इ बरे ईसू ओनसे साफ साफ कहेस, “लाजर मरि गवा अहइ। १५ मई तोहरे बरे खुस अहउँ कि मई हुवाँ नाहीं रहेउँ। इ बरे कि अब तू पचे मोरे मँ बिसवास करि सकत ह। आवा अब हम ओकरे पास चली।”

१६ फिन थोमा, जेका लोग दिदुमुस कहत रहेन, दूसरे चेलन स कहेस, “आवा हमहूँ सबइ पभू क पास चली जइसे कि हमहूँ सबे उहइ क साथे मर सकी।”

बैतनिय्याह मँ ईसू

१७ इ तरह स ईसू चला गवा अउर हुवाँ जाइके उ पाएस कि लाजर क कबर मँ रखे चार दिन होइ चुका रहेन। १८ (बैतनिय्याह यरूसलेम स करीब तीन किलोमीटर दूर रहा।) १९ भाई क मउत पर मार्था अउर मरियम क तसल्ली दियावइ क बरे अउर तमाम यहूदी नेता आवा रहेन।

२० जब मार्था सुनेस कि ईसू आवा अहइ तउ उ ओसे मिलइ क बास्ते गइ। जबकि मरियम घरे मँ रूकी रही २१ हुआँ जाइके तब मार्था ईसू स कहेस, “पभू, जदि तू हियाँ होत्या तउ मोर भाई न मरत। २२ मुला मई जानत अहउँ कि तू अबहूँ अगर परमेस्सर स जउन कछु मँगब्या, उ तोहका देई।”

२३ ईसू ओसे कहेस, “तोहार भाई जी उठी।”

२४ मार्था ओसे कहेस, “मई जानित ह कि पुनरूत्थान क आखिरी दिन लोग जिवावा जइहीं।”

२५ ईसू ओसे कहेस, “मई पुनरूत्थान अहउँ मई जीवन अहउँ जउन मनई मोहमाँ बिसवास करत ह, जी उठी। २६ अउर उ मनई जउन जियत ह अउर मोहमाँ बिसवास करत ह, कबहूँ न मरी। का तू एहमा बिसवास करत अहा?”

२७ उ ईसू स बोली, “हाँ पभू, मई बिसवास करित ह कि तू मसीह अह्या, उहइ परमेस्सर क पूत, जउन इ दुनिया मँ आवइवाला रहा।”

ईसू रोय दिहेस

२८ फिन एतना कहिके उ हुवाँ स चली गइ अउर अपने बहन क अकेले मँ बोलाइके बोली, “गुरू हियाँ अहइ, अउर तोहका बोलावत अहइ।”

२९ जब मरियम इ सुनेस तउ उ तुरन्त उठिके ओसे मिलइ क चलि दिहेस। ३० ईसू अबहुँ तलक गाँव मँ नाहीं आवा रहा। अबहीं उ उहइ जगह रहा जहाँ मार्था ओसे मिली रही। ३१ फिन जउन यहूदी घरे प ओका तसल्ली देत रहेन, जब मरियम क झटपट उठिके जात देखेन तउ इ सोचेन कि उ कबर प रोवइ क बरे जात अहइ, इ बरे उ पचे ओकरे पीछे चल दिहेन। ३२ मरियम जब हुवाँ पहुँची, जहाँ ईसू रहा तउ ईसू क देखिके ओकरे गोड़े प गिर पड़ी अउर बोली, “पभू जदि तू हियाँ होत्या तउ मोर भाई न मरत।”

३३ ईसू जब ओका अउर ओकरे साथ आए रहेन यहूदियन क रोअत चिल्लात देखेस तउ ओकर आतिमा तडपइ अउर उ बहुत ब्याकुल होइ लाग। उ बहुत घबराइ गवा। ३४ अउर बोला, “तू ओका कहाँ रखे अहा?”

उ पचे ओसे बोलेन्ह, “पभू आवा अउर देखा।”

३५ ईसू क फूटि फूटिके रोवइ लाग।

३६ इ देखिके यहूदी कहइ लागेन, “देखा! इ लाजर क बहोत पियार करत ह।”

३७ मुला ओहमाँ स कछु लोग कहेन, “इ मनई जउन आँधरे क आँखी दिहेस, का लाजर क मरइ स बचाइ नाहीं सकत?”

ईसू लाजर क फिन जिआइ दिहेस

३८ तउ ईसू अपने मन मँ एक दाई फिन विचलित होइ गवा अउर कबर कइती गवा। उ एक गुफा रही अउर ओकर दरवाजा एक ठु चट्टान स ढका रहा।

३९ ईसू कहेस, “इ चट्टान क हटावा।”

जउन मनई मरा रहा, ओकर बहिन मार्था कहेस, “पर्भू अब तलक तउ हुवाँ स गन्ध आवइ लाग, काहेकि ओका दफनाए चार दिन होइ गएन।”

४० ईसू ओसे कहेस, “का मई तोह कहे नाही कि जदि तू बिसवास करबू तउ परमेस्सर क महिमा का दर्सन पउबू।”

४१ तउ उ पचे उ चट्टान क हटाय दिहेन। अउर ईसू आपन आँखी ऊपर उठाइके कहेस, “परमपिता, मई तोहार धन्यवाद करत अहउँ, इ बरे कि तू मोर सुनि लिहा।” ४२ मई जानित ह कि तू हमेसा मोर बात सुनि लेत ह मुला मई हियाँ चारिउँ तरफ इकट्टा भौड़ स कहे अही जइसे लोग बिसवास कइ लेइ कि मोका तू भेजे अहा।” ४३ इ कहिके उ बडे जोर की आवाज दइके बोलाएस, “लाजर बाहर आइ जा।” ४४ उ मनइ जउन मरि ग रहा, बाहर आइ गावा। ओकर हाथ गोड़ अबहुँ तक कफन स बंधा रहेन। ओकर मुँह कपरा स लिपटा रहा।

ईसू ओन लोगन स कहेस, “एका खोल द्या अउर जाइ द्या।”

यहूदी नेतन क जरिए ईसू क मारि डाइ क साजिस (मत्ती २६ :१-५ ; मरकुस १४ :१-२ ; लूका २२ :१-२)

४५ एकरे बाद मरियम क साथ आए यहूदियन मँ स तमाम ईसू क इ काम देखिके ओह प बिसवास करइ लागेन। ४६ मुला ओहमाँ स कछू फरीसियन क लगे गएन अउर जउन कछू ईसू करे रहा, ओनका बताएन। ४७ फिन मुख्ययाजकन अउर फरीसियन यहूदी महासभा क बैठक बोलाएन अउर कहेन, “हमका सबेन्ह क अब का करइ चाही ? इ मनई बहुत अदभुत कारजन देखौवत अहइ।” ४८ अगर हम पचे एका अइसे करइ देब तउ ओकरे ऊपर सब बिसवास करइ लगिहइँ अउर इ तरह स रोमी लोग हियाँ आइ जइही अउर हमरे मन्दिर क अउर हमरे देस क बरवाद कइ देई।”

४९ मुला उ साल क मुख्ययाजक काइफा ओनसे कहेस, “तू पचे कछू नाही जानत अह।” ५० अउर तोहका सबेन्ह क इहउ समझ नाही अहइ कि इहइ करइ मँ तोहार फायदा अहइ, अपनी सारी जात क बचावइ क बरे सबके फायदे क बरे एक मनई क मारइ क होई।”

५१ इ बात उ अपनी तरफ स नाही कहे रहा, मुला उ साल क मुख्ययाजक होइ क नाते इ भविस्सवाणी किहे रहा, कि ईसू यहूदी रास्टर क

बरे मरइ जात अहइ, ५२ केवल यहूदी रास्टर क बरे नाही बल्कि परमेस्सर क सन्तान क बरे जउन तितर-बितर अहइ ओनका इदट्टा करइ क बदे।

५३ इ तरह स उही दिन स उ पचे ईसू क मारइ क साजिस करइ लागेन। ५४ ईसू फिन यहूदियन क बीच मँ खुलके नाही आवा अउर यरूसलेम छोड़के उ निरजन रेगिस्तान क लगे इफ्राईम सहर जाइके अपने चेलन क साथे रहइ लाग।

५५ यहूदियन क फसह क त्यौहार आवइवाला रहा। तमाम मनई अपने अपने गाँव स यरूसलेम चला गएन, जइसे कि फसह क त्यौहार क पहले खुद क पवित्र कइ लेई। ५६ उ पचे ईसू क खोजत रहेन। इ बरे जदि उ सबेन्ह मन्दिर मँ खड़ा रहेन तउ आपस मँ एक दूसरे स पूछव, सुरू करेन्ह, “तू सबेन्ह का सोचत अहा, का उ इ त्यौहार मँ न आई ?” ५७ फिन मुख्ययाजकन अउर फरिसियन इ आदेस दिहेन कि कउनो क एकर पता लगावा जाइ कि क कउनो जानत ह कि ईसू कहाँ अहइ, तो उ बताइ देइ, जेहसे कि उ ओका बन्दी बनाइ सकई।

ईसू बैतनिय्याह मँ अपने दोस्तन क साथ

(मत्ती २६ :६-१३ ; मरकुस १४ :३-९)

१२ १ फसह क त्यौहार क छः दिन पहले ईसू बैतनिय्याह कइँती चल दिहेस। हुवाँ लाजर रहत रहा जेहिका ईसू मरे स जिआइ दिहे रहा। २ हुवाँ ईसू क बरे उ पचे खाना बनवाएन। मार्था ओका खाना परोसेस। ईसू क साथे खाना खाइवालेन मँ लाजर सामिल रहा। ३ मरियम जटामाँसी स बनावा आधा आधा लीटर मँहगा इतर ईसू क पैर मँ लगाएस अउर अपने बालन स ओकर पैर पाँछेस। समूचा घर महकइ लाग।

४ ओकरे चेलन मँ एक यहूदा इस्करियोती रहा, जउन ओका धोखा देइवाला रहा, उ कहेस, ५ “इ इतर क ३०० चाँदी क सिक्कन मँ बेच के गरीबन क पइसा काहे नाही दीन्ह गवा ?” ६ ओका गरीबन क कउनो चिन्ता नाही रही, इ बरे उ अइसी बात नाही कहेस मुला उ खुदइ चोर रहा अउर रुपियन क थैली हमेसा ओकरे पास रहत रही। ओहमाँ जउन रुपिया डावा जात रहा, उ उहइ मँ स चोराइ लेत रहा।

७ तउ ईसू कहेस, “रहइ द्या। ओका छाँड़ि द्या। उ आज इ सब मोका गाड़े जाइ क तैइयारी क वास्ते करेस। ८ गरीब लोग तउ हमेसा तोहरे साथे रहिहीं मुला मई तोहरे साथे हमेसा न रहब।”

लाजर क खिलाफ साजिस

१ फसह क त्यौहार प आए यहूदियन क तमाम भीड़ क जब पता चला कि ईसू बैतनिय्याह में अहइ तउ ओसे मिलइ चल दिहेस। उ भीड़ केवल ईसू स मिलइ क बरे नाही आइ रही, मुला लाजर क देखइ क बरे आइ रही। लाजर क मरइ क बाद ईसू फिन जीवित कइ दिहेस रहा। १० इही बरे मुख्ययाजकन लाजर क भी मारइ क तरकीब सोचइ लागेन। ११ काहेकि ओहि क कारण तमाम यहूदी जनता अपने अपने नेता क छोड़िके ईसू में बिसवास करइ लाग।

ईसू क यरूसलेम में जाव:

(मत्ती २१ :१-११; मरकुस

११ :१-११; लूका १९ :२८-४०)

१२ दूसरे दिन फसह क त्यौहार प आई भीड़ जब इ सुनेस कि ईसू यरूसलेम आवत अहइ तउ १३ लोग खजूर क टहनी लइके ओसे मिलइ चल पड़ेन। उ पचे गोहरावत रहेन,
“होसन्ना!

“धन्य अहइ उ जउन परभू क नाउँ स आवत ह!”
उ जउन इस्त्राएल क राजा अहइ।”

१४ तब ईसू क एक गदहा मिला अउर उ ओकरे ऊपर चढ़ि लिहेस। जइसा कि पवित्र सास्तर में लिखा अहइ:

१५ “सिय्योन क पुत्री डेराअ जिन!
देखा! तोहार राजा गदहे क बच्चा प
बइठके आवत अहइ।” १

१६ पहिला तउ ओकर चलन ओकरे व्यवहार क नाही समझ पाएन्ह लेकिन जब ईसू क महिमा परगट भइ तउ समुझ पाएन कि सास्तर में ओकरे बारे में सब बात लिखी रहिन अउर तमाम मनई क ओकरे बार में अइसा बरताव रहा।

१७ ओकरे साथ जउन भीड़ रही, उ इ साच्छी दिहेस कि उ लाजर क कबर स बोलाइके मरे स फिन जिआइ दिहेस। १८ तमाम लोग ओसे मिलइ क बरे इहइ बरे आइ रहेन काहेकि उ पचे सुने रहेन कि इ अद्भुत कारज करइवाला उहइ अहइ। १९ तउ फरीसी आपुस में कहइ लागेन, “सोचा तू सबेन्ह कछु नाही कइ पावत अहा अउर देखा पूरी दुनिया ओकरे पीछे पड़ गइ अहइ।”

मउत क बावत ईसू क बताउव

२० फसह क त्यौहार प यरूसलेम में आराधना करइवालेन में कछु यूनानी रहेन। २१ उ सबेन्ह गलील में बैतसैदा क रहइवाले फिलिप्पुस क लगे गएन अउर ओसे विनती करत भए कहइ लागेन,
“महासय, हम पचे ईसू क दर्सन करइ चाहत अही।” तउ फिलिप्पुस आइके अन्दरयास स बाताएस। २२ फिन अन्दरयास अउर फिलिप्पुस ईसू क पास आइके कहेन।

२३ ईसू ओनका जवाब दिहेस, “मनई क पूत क महिमावान होइ क समइ आइ ग बाटइ। २४ मई तोहसे सही सही बतावत अहउँ कि जब तलक गोहूँ क एक दाना जमीन प गिरके मर नाही जात, तब तक उ एकइ रहत ह, मुला जब उ मरि जात ह तउ अनगिनत दानन क पइदा करि देत ह। २५ जेका आपन जिन्नगी पियारी अहइ उ ओका खोइ देइ, मुला जेका इ दुनिया में अपनी जिन्नगी स परिम नाही अहइ, उ एँका अनन्त जीवन क वास्ते रखे रही। २६ जदि कउनो मोरी सेवा करत ह तउ जरूर मोर पाछा करत ह अउर जहाँ मई अही, हुवाँ मोर सेवक भी रही। जब कउनो मोर सेवा करत ह तउ परमपिता ओकर सम्मान करी।

ईसू अपनी मउत क तरफ इसारा किहेस

२७ “अब मोर जिअरा घबरात अहइ। मई का कहउँ, हे परमपिता, मोका दुःख क इ घड़ी स बचावा? मुला इहइ समइ क बरे तउ मई आइ अहउँ। २८ हे परमपिता, अपने नाम क महिमा दूया।”

तउ आकासवाणी भइ, “मई एकर महिमा किए अहउँ अउर मई फिन एँकर महिमा करव।”

२९ तउ हुवाँ मौजूद भीड़ जउन एक सुने रहेन, कहइ लाग कि कउनो बादर गरजा बाटइ। दूसर इ कहइ लागेन, “कउनो सरगदूत ओसे बतियान ह।”

३० एँकरे जवाब में ईसू कहेस, “इ आकासवाणी मोरे बरे नाही भइ, इ तोहरे बरे भइ रही। ३१ अब इ दुनिया क निआव क समइ आइ ग बाटइ। अब इ दुनिया क सासक (हियाँ प मतलब अहइ सइतान) क निकार दीन्ह जाई। ३२ अउर जब मई धरती क ऊपर उठाइ लीन्ह जावइ तउ फिन सब लोगन क

११२ :१३ उद्धृत भजन संहिता ११८ :२५-२६

११२ :१५ उद्धृत जकर्याह ९ :९

अपनी ओर खींचव।”^{३३} उ इ बतावइ क बरे अइसा कहत रहा कि उ कइसी मउत मरइ जात अहइ।

^{३४} इ सुनिके भीड़ ओका जवाब दिहेस, “हम पचे व्यवस्था क इ बात सुने अही कि मसीह हमेसा रही। इ बरे तू कइसे कहत अहा, ‘मनई क पूत क जरूर स ऊपर उठाइ लीन्ह जाई?’ इ ‘मनई क पूत कउन अहइ?’”

^{३५} तउ ईसू ओनसे कहेस, “तोहरे बीच मँ ज्योति अबे कछू समइ अउर रही। जब तक ज्योति अहइ, चलत रहा, जइसे कि अधियारा (पाप) तोहका घेर न लेइ, काहेकि जउन मनई अँधेरे मँ चलत ह, उ इ नाही जानत कि कहाँ जात अहइ।^{३६} जब तक ज्योति तोहरे लगे अहइ, ओहमाँ बिसवास बनाए रखा जइसे कि तू पचे ज्योति क सन्तान होइ सका।” ईसू इ कहिके कहूँ चला गवा अउर ओनसे छिप गवा।

यहूदी क ईसू मँ बिसवास न करब

^{३७} ईसू ओनके सबके सामने तमाम अद्भुत कारजन परगट किहेस मुला उ पचे ओकरे मँ बिसवास नाही किएन्ह^{३८} जइसे कि नबी यसायाह क कहब सही होइ सकइ, “पभूँ, मोरे संदेस प कउन बिसवास किहे अहइ? काहेकि ऊपर पभूँ क ताकत केह पइ परगट भइ अहइ?”^{३९}

^{३९} इहइ बरे उ सब बिसवास नाही कइ सकेन। काहेकि यसायाह फिन केह रहा,

^{४०} “उ ओनकइ आँखी आँधर

अउर ओनकइ हिरदइ कठोर बनाएस जइसे,

उ पचे अपनी आँखी स देख न सकई

अउर बुद्धि स समझ न पावई

अउर मारी कइँती न मुड़ई,

जइसे कि मइँ ओनका चंगा न कइ पाई।”^{४१}

^{४१} यसायाह अइसा इ बरे कहे रहा, काहेकि उ ओकर महिमा देखे रहा अउर ओकरे बारे मँ वतियान भी रहा।

^{४२} तबहूँ तमाम लोग अइसे रहेन, जेहिमाँ तमाम यहूदी नेतन रहेन जे ओहमाँ बिसवास किएन्ह। मुला फरीसियन क डर क मारे अपने बिस्वास क खुलासा नाही किएन्ह, नाही तउ ओनका सबेन्ह क पराथना क जगह स निकारि देइ क डर रहा।^{४३} ओनका सबेन्ह क मनई क दीन्ह

सम्मान परमेस्सर क दीन्ह सम्मान स जियादा अच्छा लागत रहा।

ईसू क उपदेस प मनई क निआव होई

^{४४} ईसू बोलाँइके जोर स कहेस, “उ जउन मोरे मँ बिसवास करत ह, उ मोरे मँ नाही, बल्कि ओकरे मँ बिसवास करत ह जउन मोका भेजेस।^{४५} अउर जउन मनई मोका देखत ह, उ ओका देखत ह जउन मोका भेजेस।^{४६} मइँ दुनिया क रोसनी क तरीके स आवा जइसे कि जउन मनई मोरे मँ बिसवास करत ह, उ अँधेरे मँ न रहइ।

^{४७} “जदि कउने मनई मोरे बात सही सुनिके ओका नाही मानत तबहूँ मइँ ओका अपराधी ठहरावइ क बरे नाही आइ अही, मइँ तउ दुनिया क उद्धार क वास्ते आइ अही।^{४८} जउन मनई मोका नाही मानत अउर हमरी बातन क नाही मानत, ओकरे बरे एक अहइ जउन ओकर निआव करी। उ उहइ अहइ, अपनी बातन स जेहिमा मइँ उपदेस दीन्ह। आखिरी दिन उहइ ओकर निआव करी।^{४९} काहेकि मइँ अपनी तरफ क कछू नाही कहे अही, मइँ परमपिता (परमेस्सर) क आदेस क पालन करत अही, जउन मोका भेजेस, उ मोका बताए अहइ कि मइँ का उपदेस देइ।^{५०} अउर मइँ जानित ह कि ओकरे आदेस क मतलब अहइ अनन्त जीवन। इ बरे जउन मइँ बोलित हूँ, उहइ क ठीक उहइ अहइ जउन परमपिता मोसे कहे अहइ।”

ईसू अपने चलन क गोड़ धोएस

१३ ^१ फसह क त्यौहार क पहिले ईसू देखेस कि इ दुनिया क छोड़इ अउर परमपिता क पास जाइ क ओकर समइ आइ गवा अहइ तउ इ दुनिया मँ जउन आपन रहेन अउर जेका उ पिरेम करत रहा, ओनके ऊपर उ बहुत जियादा पिरेम देखाँएस।

^२ संझा क खाना खावा जात रहा। सइतान अब तलक समौन क बेटवा यहूदा इस्करियोती क मन मँ इ डाइ चुका रहा कि उ ईसू क धोखे स पकड़वाइ देइ।^३ ईसू इ जानत रहा कि परमपिता सब चीज ओकरे हाथन मँ सौंप दिहे अहइ अउर परमेस्सर स आवा बाटइ, अउर परमेस्सर क पास वापस जात अहइ।^४ इ बरे उ खाना छोड़के टाढ़ होइ गवा। उ आपन ऊपर क सब कपरा उतार दिहेस अउर एक टु

**१२ : ३८ उद्धृत यसायाह ५३ : १

††१२ : ४० उद्धृत यसायाह ६ : १०

अँगौछा अपने चारों तरफ लपेट लिहिस । ५ फिन एक टु घड़ा मँ पानी भरेस अउर अपने चलन क पाँव धोअइ लाग अउर जउन अँगौछा लपेटे रहा, उहइ स सबकइ पाँव पोछइ लाग ।

६ फिन जब उ समौन पतरस क लगे पहुँचा तउ पतरस ओसे कहेस, “पभू, का तू मोरे पाँव धोअइ आवत अहा ?”

७ एकरे जवाब मँ ईसू कहेस, “अबही तू नाही जानत अहा कि मई का करत अही, बाद मँ तू जान जाब्या ।”

८ परतस ओसे कहेस, “तू मोर पाँव कबहू नाही धोउब्या ।”

ईसू जवाब दिहेस, “जब तोहार पाँव मई न धोउब तउ तू मोरे लगे जगह नाही पाइ सकत्या ।”

९ समौन पतरस ओसे कहेस, “पभू, तू मोर पाँव नाही मोर हाथ अउर मुँडवा क भी धोइ द्या ।”

१० ईसू ओसे कहेस, “जे नहाइ चुका अहइ, ओका पैर धोअइ क अलावा अउर कउनो चीज धोअइ क जरूरत नाही अहइ । उ तउ पूरी तरह साफ सुथरा होत ह । तू पचे साफ अहा, मुला सब जने नाही ।” ११ उ ओका जानत रहा जउन ओका धोखा स पकड़वावइ चाहत रहा । इ बरे उ कहे रहा, “तोहरे मँ स सब पवित्तर नाही अहइ ।”

१२ जब उ सबक पाँव (गोड़) धोइ लिहेस तउ फिन स आपन बाहरी कपड़ा पहिर लिहेस अउ, अपनी जगह प आइके बइठ गवा । अउर ओनसे बोला, “का तोहका मालूम अहइ कि मई तोहरे बरे का किहेउँ ? १३ तू पचे मोका ‘गुरू’ अउर ‘पभू’ कहत ह, अउर ठीक कहत ह, काहेकि मई उहइ अही । १४ इ बरे जब मई पभू अउर गुरू होइके तोहार पचे का पाँव धोवा तउ तोहका सबेन्ह क एक दूसरे क पाँव धोवइ चाही । मई तोहरे सामने एक उदाहरण पेस करत अहउँ । १५ तू पचे दूसरे क साथ वइसे करा जइसे मई तोहरे साथ करत अही । १६ मई तोहका सच्ची बात बतावत अही कि दास मालिक स बड़ा नाही होत अउर संदेस देइवाला ओसे बड़ा नाही होत जउन ओका भेजेस । १७ जब तू पचे इ बात जानत अहा । अउ ओकर पालन करब्या तउ तू पचे सुखी रहब्या ।

१८ “मई तोहरे सबेन्ह क बारे मँ नाही कहत अहउँ । मई ओनका जानित ही जेनका मई चुने अहउँ । अउर इहउ कि यहूदा बिसवासघाति अहइ मुला मई इ बरे चुने अही जइसे कि पवित्तर सास्तर क बचन सही उतरइ, उहइ जउन मोरे साथ रोटी खाएस, मोरे विरोध मँ होइ गवा । १९ इ सब घट जाइ क पहले मई इ बरे बतावत अहउँ जइसे

कि जब इ घटित होइ जाइ तउ तू पचे बिसवास करा कि उ मई अहउँ । २० मई तोहका सही सही बतावत अहउँ कि उ जउन मोरे भेजा गवा क लइ लेत ह, उ मोका स्वीकार कर लेत ह, अउर जउन मोका स्वीकार कर लेत ह, ओका स्वीकार कर लेत ह, जे मोका भेजेस ।”

ईसू क कहब: मरवावइ क बरे ओका कउन पकड़वाइ

(मत्ती २६ :२०-२५ ; मरकुस

१४ :१७-२१ ; लूका २२ :२१-२३)

२१ इ कहे क बाद ईसू बहुत घबड़ाइ गवा अउर इ साच्छी दिहेस, “मई तोहसे सच्ची बात कहत अहउँ तोहरे मँ स एक टु मनई धोखा दइके मोका पकड़वाइ ।”

२२ तब ओकर चलन एक दूसरे क देखइ लागेन । उ पचे इ तय नहीं कइ पावत रहन कि उ केहिके बारे मँ बतावत अहइ । २३ ओकर एक चेला ईसू क लगे बइठा रहा । ईसू ओका बहुत चाहत रहा । २४ तउ समौन परतस ओका इसारा कइके पूछइ बरे कहेस कि ईसू केकरे बारे मँ बतावत अहइ ।

२५ ईसू क चहेता चेला ओकरी छाती प झुकके ओसे पूछेस, “पभू उ कउन अहइ ?”

२६ ईसू जवाब दिहेस, “रोटी क टुकड़ा कटोरा मँ बोर के जेका मई देव, उहइ उ अहइ ।” फिन ईसू रोटी क टुकड़ा कटोरा मँ बोर के ओका उटाइके समौन क बेटवा यहूदा इरूकरियोती क दिहेस । २७ जइसे यहूदा रोटी क टुकड़ा लिहेस ओहमा सइतान समाइ गवा । फिन ईसू ओसे कहेस, “जउन तू करइ जात अहा, ओका जल्दी स कइ ल्या !” २८ मुला हुवाँ बइठे लोगन मँ स केहू नाही समझ पाएस कि ईसू ओसे अइसी बात काहे करत अहइ । २९ कछू सोचेन कि रूपियन क थैली यहूदा क लगे रहत ह, इ बरे ईसू ओसे कहत अहइ कि त्यौहार क बरे जरूरी सामान खरीद ल्या या इ कहत अहइ कि गरीबन क कछू दइ द्या ।

३० इ बरे यहूदा रोटी क टुकड़ा लइ लिहेस अउर तुरन्त चला गवा । इ रात क समइ रहा ।

अपनी मउत क बावत ईसू क बात

३१ ओकरे चला जाइ क बाद ईसू कहेस, “मनई क पूत अब महिमावान भवा अहइ । अउर ओसे परमेस्सर क महिमा भइ अहइ । ३२ जदि ओसे परमेस्सर क महिमा भइ अहइ तउ परमेस्सर खुदइ स ओका महिमावान बनाई । अउर उ ओका जल्दी महिमा देइ ।

३३ "ऐ मोर चहेता बच्चो! मई तनिक देर अउर तोहरे साथ अहउँ। तू पचे मोका ढूँढिब्या अउर जइसे कि मई यहूदियन स कहे अहउँ, तू सबेन्ह हुवाँ नाही जाइ सकत्या, जहाँ मई जात अहउँ, वइसे मई तोहसे अब कहत अहउँ।

३४ "मई तोहका सबेन्ह क एक नवा आदेस देत अहउँ कि तू सबेन्ह एक दूसरे स पिरम करा। जइसे मई तोहसे सबेन्ह स पिरम करेउँ ह, वइसे तू पचे एक दूसरे स पिरम करा। ३५ जब तू पचे एक दूसरे स पिरम करब्या, तबहीं सब जानि पइहीं कि तू सबेन्ह मोर चेलन अह्या।"

ईसू क बताउब पतरस ओका
पहिचानइ स मना कइ देई

(मत्ती २६ :३१-३५ ; मरकुस
१४ :२७-३१ ; लूका २२ :३१-३४)

३६ समौन पतरस ओसे पूछेस, "पभू, तू कहाँ जात अहा?"

ईसू जवाब दिहेस, "जहाँ मई जात हउँ, अब तू मोरे पाछे नाही आइ सकत्या, मुला तू बाद मँ मोरे पाछे अउब्या।"

३७ पतरस ओसे पूछेस, "पभू, मई तोहरे पाछे काहे बरे नाही आइ सकत? मई तउ तोहरे बरे आपन जान तक दइ देब।"

३८ ईसू जवाब दिहेस, "तू मोरे लिए आपन जान देब्या? मई तोहसे सच्ची बात कहत अहउँ कि जब तलक तू तीन दाई इन्कार न कइ देब्या तब तक एक मुगाँ बाँग न देई।"

ईसू क चेलन क समझाऊब

१४ ईसू कहेस, "तू सबन्क परेसान न होइ चाही। परमेस्सर मँ बिसवास करा अउर मोरे मँ बिसवास बनाए रखा। २ मोरे पिता क घरे मँ तमाम कमरा अहइँ। यदि अइसा न होत तउ मई तोहसे कहि देइत मई तोहरे सबेन्ह क बरे जगह बनावइ जात अहउँ। ३ अउर यदि मई हुवाँ जाई अउर तोहरे बरे जगह बनाई तउ मइ फिन हिआँ आउब अउर अपने साथ तोहका सबेन्ह क हुवाँ लइ चलब जइसे कि तू पचे हुवाँ रहा, जहाँ मई रहब। ४ अउर जहाँ मई जात अहउँ हुवाँ क रास्ता तोहका पता अहइ।"

५ थोमा ओसे कहेस, "पभू, हम नाही जानत अही कि तू कहाँ जात अहा। फिन हुवाँ क रास्ता कइसे जान सकित ह?"

६ ईसू ओसे कहेस, "मई रस्ता अहउँ, सच्चाई अहउँ अउर जीवन अहउँ। मोरे बगैर कउनो परमपिता क लगे नाही आइ सकत। ७ यदि तू मोका जान लेत्या तउ तू परमपिता क जान लेत्या। अउर तू ओका जानत अहा अउर ओका देखि चुका अहा।"

८ फिलिप्पुस ओसे कहेस, "पभू हमका परमपिता क दर्सन कराइ द्या। हमका संतोस होइ जाई।"

९ ईसू ओसे केहस, "फिलिप्पुस मई एँतने जियादा समइ स तोहरे साथ अहउँ अउर तू तबहूँ मोका नाही जानत अहा? जे मोका देख लिहेस, उ परमपिता क देख लिहेस। फिन तू कइसे कहत अहा, 'हमका परमपिता क दर्सन कराइ द्या'। १० का तोहका इ बिसवास नाही अहइ कि मई परमपिता मँ अहउँ अउर परमपिता मोरे मँ अहइ? जउन बात मई तोहसे कहत अहउँ, अपनी तरफ स नाही कहत अहउँ। परमपिता जउन मोरे मँ रहत ह, आपन काम करत ह। ११ यदि मई कहत अहउँ कि मई परमपिता मँ अहउँ अउर परमपिता मोरे मँ अहइ, तउ मोर बिसवास करा अउर यदि नाही तउ उ अद्भुत कारजन क कारण बिसवास करा जउन मई किहेउँ ह।

१२ "मई तोहमे सच्ची बात कहत अही, जउन मोरे मँ बिसवास करत ह, उहइ वइसे काम करत ह जइसे मई करित ह। उ तउ इ सब कामन स बड़ा काम करी। काहेकि मई परमपिता क पास जात अहउँ। १३ अउर मई उ सब कारज करबइ जउन तू पचे मोरे नाउँ स मँगब्या, जइसे कि पूत परमपिता क महिमा करइ। १४ जब तू हमसे मोरे नाउँ स कछू मँगब्या, ओका मई करबइ।

पवित्तर आतिमा क कसम

१५ "जउ तू मोसे पिरम करत होब्या, तउ हमरी आग्या क पालन करब्या। १६ मई परमपिता क पराथना करबइ अउर उ तोहका सबेन्ह का एक दूसर सहायक देइ जउन तोहरे साथे हमेसा रही। १७ एकर मतलब अहइ 'सच्चाई क आतिमा' ##जेहका दुनिया लेइ नाही पावत, काहेकि उ न तउ देखत ह अउर न तउ जानत ह। तू सबेन्ह ओका

##१४ :१७ सच्चाई क आतिमा पवित्तर आतिमा, एँका परमेस्सर क आतिमा अउ सुखदाता भी कहा गवा ह। इ मसीह स जुरा अहइ। इ संसार मँ मनइयन क बीच काम करत ह। यूहन्ना १६ :३३

जानत ह, काहेकि उ आज तोहरे साथ रहत ह। अउर आगे तोहरेन मँ साथे रही।

१८ “मई तोहका सबेन्ह क अनाथ न छोड़व। मई तोहरे पास आवत अहउँ। १९ कछू देर क बाद दुनिया मोका अउर न देखी मुला तू पचे मोका देखब्या काहेकि मई जिअत अही अउर तू सबेन्ह जिअत रहब्या। २० उहइ दिन तू सबेन्ह जानि पउब्या कि मई परमपिता मँ अहउँ, तू मोरे अन्दर अहा अउर मई तोहरे अन्दर। २१ जउन मनई मोर आदेसन क जानत हइ अउर ओनकइ पालन करत ह, मोसे पिरम करत ह। जे मोका पिरम करत ह ओका परमपिता पिरम करी। मई भी उहइ क पिरम करव अउर खुदइ क ओकरे ऊपर परगट करवइ।”

२२ यहूदा (यहूदा इस्करियोती नाही) ओसे कहेस, “पभू, काहे बरे तू खुदइ क हमरे ऊपर परगट करा चाहत ह अउर दुनिया प नाही?”

२३ एँकरे जवाब मँ ईसू ओसे कहेस, “जउन मनई मोरे मँ पिरम करत ह, उ मोरी बातन क मानत ह, अउर ओसे परमपिता पिरम करी। मई अउर मोर परमपिता ओकरे पास आउव अउर उहइ क साथ रहवइ। २४ जउन मनई मोसे पिरम नाही करत, उ मोर उपदेस क नाही मानत। मई जउन उपदेस तोहका देत अही, उ मोर न अहइ उ पिता क उपदेस अहइ, जउन मोका भेजेस।”

२५ “इ सब बात मई तोहसे सबेन्ह स तबहीं बताए रहेउँ जब मई तोहरे साथ रहेउँ। २६ मुला उ सहायक (अर्थात पवित्र आत्मा) जेहिका परमपिता मोरे नाउँ स भेजी, तोहका पचन्क सब कछू बताई। अउर जउन कछू मई तोहका पचन्क बताए अहउँ, ओका तोह पचे का याद कराई।”

२७ “मई तोहरे बरे आपन सांति छोड़त अहउँ। मई तोहका पचन्क खुदइ आपन सांति देत अही। मुला मई एँका वइसे नाही देत अहउँ, जइसे दुनिया देत ह। तोहरे मन क धबराइ क जरूरत नाही अहइ अउर न तउ ओका डेराइ चाही। २८ तू मोका कहत सुने अहा, ‘मई जात अहउँ अउर तोहरे लगे फिन आउव।’ जदि तू मोसे पिरम करे होत्या तउ तू खुस होई जात्या, काहेकि मई परमपिता क लगे जात अहउँ। काहेकि परमपिता मोसे बड़ा अहइ। २९ अउर अबहीं इ सब घटित होइ क पहिले मई तोहका बताइ दिहे अही, जइसे कि जउ इ घटित होइ जाइ तउ तू पचे बिसवास कइ सका।

३० “अउर जियादा समइ अब मई तोहरे साथ बात न करिब इ बरे कि जगत क सासक आवत अहइ। मोरे ऊपर ओकर बस नाही चलत। ३१ मुला

इ सब बात इ बरे होत अहइ जइसे कि दुनिया जान जाइ कि मई परमपिता स पिरम करित ह। अउर परमपिता जइसी आग्या हमका दिहे अहइ, मई बइसे करत अही।

“अबहीं उठा हम सबेन्ह हिआँ स चल देइ।”

ईसू सच्ची दाखलता

१ ईसू कहेस, “मई दाखलता अहउँ अउर १५ मोर परमपिता देख रेख करइवाला माली अहइ। २ मोरी उ साखा क पिता काट देत ह जउने मँ फर नाही लागत। जउने साखा मँ फर लागत ह, ओका उ छाँट लेत ह, जइसे कि ओहपे अउर जियादा फर लागइ। ३ तू पचे मोरे उपदेस क सुने अहा, इ बरे पहिले स सुद्ध अहा। ४ तू मोरे मँ रहा अउर मई तोहरे मँ रहव। वइसेन जइसेन कि कउनो साखा जब तलक दाखलता मँ बनी नाही रहत, तब तलक अपने आप फरि नाही सकत, वइसेन, तू पचे तब तलक सफल नाही होइ सकत्या जब तलक मोरे मँ न रहब्या।

५ “उ दाखलता मई अहउँ अउर तू ओकर साखा अह्या। जे मोरे मँ रहत ह, अउर जेहमा मई रहित ह, उ बहुत फरत ह, काहेकि बिना मोरे तू कछू नाही कर सकत्या। ६ जदि कउनो मोरे मँ नाही रहत तउ उ टूटी साखा क तरह फेंक दीन्ह जात ह अउर सूख जात ह। फिन उ सूखी लकड़ियन क बटोररिके आगी मँ झाँक दीन्ह जात ह अउर ओनका जलाय दीन्ह जात ह। ७ जदि तू मोरे मँ रहब्या, अउर मोर उपदेस तोहरे मँ रही, तउ जउन कछू तू चाहत ह, ओका माँगा अउर उ तोहका मिल जाई। ८ इ मोरे परमपिता क महिमा होत ह कि तू बहुत सफल होइ जा अउर मोर चेलन बन जा।

९ “जइसे परमपिता मोसे पिरम करे बाटइ, मई भी तोहसे बइसे पिरम करे अही। मोरे पिरम मँ बना रहा। १० जदि तू मोरे आदेस क पालन करब्या तउ तू मोरे पिरम मँ बना रहब्या। वइसे ही जइसे कि मई अपने पिता क आदेसन क पालन करत भए ओकरे पिरम मँ बना रहित ह। ११ मई इ सब बात तू पचे स इ बरे बतावत अहइ जइसे कि मोर आनन्द तोहरे मँ बना रहइ अउर तोहार आनन्द पूरा होइ जाइ। इ मोर आदेस अहइ। १२ कि तू आपस मँ पिरम करा, जइसे मई तू पचे स पिरम करे अही। १३ बड़वार स बड़का पिरम जउन कउनो मनई कइ सकत ह, उ अहइ अपने मीतन क बरे आपन पुरान निछावर कइ देव। १४ जउन आदेस तोहका मई देत अही, जदि तू ओन पइ चलत रहब्या तउ तू मोर मीत अह्या। १५ अबहीं स मई तू पचे क ‘दास’

न कहब, काहेकि कउनो दास इ नाहीं जानत कि ओकर मालिक क करत अहइ, मई तउ तोहका 'मीत' कहत अही। मई तू पचे क उ सब बात बताइ दीन्ह जउन मई अपने परमपिता स सुने रहेउँ।

१६ "तू मोका नाहीं चुने रह्या, मई खुदइ तोहका चुने रहेउँ अउर इ निस्वय करे अही कि तू जा अउर सफल होइ जा। मई चाहित ह कि तोहका सफलता मिलइ, अउर मोरे नाउँ स जउन कछू तू चाहा परमपिता तोहका दई देइ।" १७ मई तोहका इ आदिस देत अही कि तू एक दूसरे स पिरम करा।

ईसू क चेतावनी

१५ "जदि दुनिया तोहसे दूस्मनी करत ह तउ इ बात तू याद कइ ल्या कि तोहसे पहले हमसे दुस्मनी करत ह।" १६ जदि तू दुनिया क होत्या तउ इ दुनिया तोहसे अपने क नाई पिरम करत मुला तू पचे दुनिया क न अह्या अउर इ बरे दुनिया तोहसे दुस्मनी करत ह।

२० "मोर बचन याद रखा कि एक दास अपने मालिक स बड़ा नाहीं होत। इ बरे जदि उ सबेन्ह मोका कस्ट पहुँचाए अहइ अउर सतावत अहइ तउ उ पचे तोहका भी सतइहीं। अउर जदि उ मोर बातन मनिहइ तउ तोहार बातन भी मनिहइ। २१ मुला उ सबेन्ह मोरे कारण तोहरे सबेन्ह क साथ उ सब कछू करिहइ, काहेकि उ ओका नाहीं जानत अहइ जे मोका भेजेस। २२ जदी मई न आइत अउर ओसे बात न करित, तउ उ सबेन्ह कउनो पाप क दोखी न होतेन। मुला अब ओनके पास अपने पाप स बचइ क कउनो बहाना नाहीं अहइ।

२३ "जउन मनई हमसे दुस्मनी ठान लेत ह, उ परमपिता स दुस्मनी करत ह।" २४ जदि मई ओनके बीच मँ काम न करित, जउन कि कबहूँ कउनो मनई नाहीं करे रहा, तउ उ सबेन्ह पाप क दोखी न रहतेन, मुला अब जब उ पचे देख चुका अहइ, तबहूँ मोसे अउर परमपिता स दुस्मनी रखे अहइ। २५ मुला इ एह बरे भवा कि ओनके व्यवस्था मँ जउन लिखा अहइ, उ खरा उतरइ। 'उ पचे बेकार मँ हमसे बैर करेन्ह'। २६

२६ "जब उ सहायक जउन सत्य क आतिमा बाटइ अउर पिता क तरफ स आइ बा, तोहरे पास आई, जेका मई परमपिता क तरफ स भेजब, उ हमरी तरफ स साच्छी देई।" २७ अउर तूहूँ साच्छी देब्या, काहेकि तू सुरूआतइ स मोरे साथ अहा।

१६ "इ सब बात मई तोहसे इ बरे बतावत अही कि तोहार बिसवास डगमगाय न जाइ। २ उ पचे तोहका सबन्क आराधनालय स निकार देइहीं सही-सही तउ उ समइ आवइवाला अहइ जब तोहरे मँ स कउनो क मारके हर एक इहइ सोची कि उ परमेस्सर क सेवा करत अहइ। ३ उ सबेन्ह अइसा इ बरे करिहइ, काहेकि उ न तउ परमपिता क जानत ही अउर न तउ मोका। ४ मुला मई तोहसे इ सब इ बरे कहत अही जइसे कि जब ओनकइ समइ आइ जाइ तउ तोहका इ याद रहइ कि मई ओनके बाबत तोहका बताए रहे जब मई तोहरे साथ रहेउँ।

पवित्र आतिमा क कारण

"सुरआत मँ इ सब बात मई तोहका नाहीं बताए रहेउँ, काहेकि मई तोहरे साथ रहेउँ। ५ मुला अब मई ओकरे पास जात अही, जे मोका भेजेस अउर तोहरे बीच स कउनो मोसे इ न पूछी, 'तू कहाँ जात अहा?' ६ काहेकि मई इ बात बताइ दिहे अही, तोहार दिल दुःखी होइ गवा अहइ। ७ मुला मई तोहसे सच्ची सच्ची कहत अही कि एहमाँ तोहरा भलाई अहइ कि मई जात अही। काहेकि जदि मई न जाउँ तउ सहायक तोहरे पास न आई। जदि मई हियाँ स चला जाब तउ मई ओका तोहरे पास भेजब।

५ "अउर जब उ आइ तउ पाप, धार्मिकता अउर निआव क बावत दुनिया क सक दूर करी। ९ पाप क बावत इ बरे कि उ पचे मोर मँ बिसवास नाहीं करतेन। १० धार्मिकता क बावत इ बरे कि अब मई परमपिता क पास जात अही। अउर तू सबेन्ह अब अउर जियादा समइ तक मोका न देखब्या। ११ निआव क बावत, इ बरे कि इ जगत क सासक क अपराधी ठहरावा ग अहइ।

१२ "मोका तोहसे अबहिं तमाम बात बतावइ क अहइ, मुला तू सबेन्ह ओका सह न पउब्या। १३ मुला जब सच्चाई क आतिमा आई तउ उ तोहका पूरी सच्चाई क राह देखाई काहेकि उ अपनी तरफ स कछू न कही। उ जउन कछू सुनी उहइ बताई। अउर जउन कछू होइवाला अहइ, ओका उजागर करी। १४ उ मोर महिमा करी, काहेकि जउन मोर अहइ, ओका लइके उ तोहका बताई। १५ हर चीज जउन परमपिता क अहइ, उ मोर अहइ। इहइ बरे मई बताए अहउँ, जउन कछू मोर अहइ, ओका उ लइ लेई अउर तोहका बताई।

दुःख खुसी मैं बदल जाई

१६ “थोड़े समझ क बाद तू पचे मोका अउर नाही देख पउब्या। अउर कछू समझ क बाद तू सबेन्ह मोका फिन देखब्या।”

१७ तउ ओके चलन आपस मैं कहेन, “इ कावा जउन उ मोका बतावत अहइ, तनिक देर क बाद मोका न देख पउब्या अउर तनिक देर क बाद तू पचे फिन मोका देखब्या ?” अउर भई परमपिता क पास जात अहउँ ? १६ फिन उ पचे कहइ लागेन, “इ ‘तनिक’ देर क बाद का मतलब अहइ ? जेकरे बावत उ बतावत अहइ ? उ का कहत अहइ, हम समझ नाही पावत अही।”

१८ ईसू इ समझ गवा कि उ पचे कछू पूछा चाहत अहइ। इ बरे ईसू ओसे कहेस, “का तू पचे जउन मई कहेउँ उहइ पर सोच विचार करत अहा, ‘थोड़ा समझ क पाछे तू मोका अउर जियादा न देख पउब्या अउर फिन थोड़े समझ क बाद तू मोका देखब्या ?” २० मई तोहका सही बतावत अहउँ, तू सबइ रोउब्या अउर सोक पउब्या मुला इ दुनिया खुस होई। तोहका दुःख होई मुला तोहार दुःख आनन्द मैं बदल जाई।

२१ “जब कउनो स्त्री बच्चा पइदा करत ह तउ ओका बड़ी तकलीफ होत ह, काहकि उ दरद क समझ रहत ह। मुला जब उ बच्चा पइदा कइ चुकत ह तउ उ इनता आनन्द होत ह कि एक ठु इन्सान इ दुनिया मैं पइदा भवा अहइ अउर आपन सब दुःख भूल जात ह। २२ इ बरे तू पचे इ समझ वइसे दुःख अहा, मुला जब मई तोहसे फिन मिलबइ तउ तोहार दिल मैं आनन्द होई। अउर तोहार आनन्द तोहरे कउनो भी छीन न पाई। २३ उ दिन तू पचे हमसे कउनो चीज न पूछ्या। मई तोहसे सच्ची बात बतावत अही, मोरे नाम स परमपिता स जउन कछू तू पचे मँगब्या, उ ओका तोहका दइ देई। २४ अब तक मोरे नाउँ स तू पचे कछू नाही मांगे अहा। मांगा, तोहका जरूर मिली। ताकि तोहका भरपूर आनन्द मिलइ।

दुनिया प जीत

२५ “इ सब बातिन क मई उदाहरण दइके बताए अहेउँ अब उ समझ आवत अहइ जब मई तोहसे उदाहरण दइके बात न कर पाउब मुला परमपिता क बावत खुलके तोहसे बतियाब। २६ उ दिन तू मोरे नाउँ स मँगब्या अउर मई तोहसे इ नाही कहत अहउँ कि मई तोहरे तरफ स परमपिता स पराथना करब। २७ परमपिता खुदइ तोहरे पिरम

करत ह, काहेकि तू मोसे पिरम करत ह। अउर यह मान लिहा कि मई परमेस्सर स आवा अहउँ। २८ मई परमपिता स परगट भएउँ अउर इ दुनिया मैं आएउँ। अउर अब मई इ दुनिया क छोड़के परमपिता क पास जात अही।”

२९ ओकर चलन कहेन, “देखा अब तू हम पचन क बिना कउनो दिस्टान्त क खोलके बतावत अहा। जउन कठिन सब्द अहइ ओनका तू नाही बइपरत अहा। ३० अब हम पचे समझ ग अही की तू सब कछू जानत अहा। अब तू नाही चाहत अहा कि केहू कउनो परस्न पूछइ एसे हमका सबेन्ह क बिसवास होइ ग अहइ कि तू परमेस्सर स परगट भवा अहा।”

३१ ईसू ओनसे कहेस, “का तोहका अब इ बिसवास भवा अहइ ? ३२ सुना, अब समझ आवत अहइ, हिआँ तक कि आइ ग अहइ, जबहिं तू पचे सब तितर बितर होइ जाब्या अउर तोहरे मैं स सब कउनो अपने अपने घरे चला जाब्या अउर मोका अकेले छोड़ देब्या, मुला मई अकेले नाही अही, काहेके परमपिता मोरे साथ अहइ।

३३ “इ सब बातन मई तोहसे इ बरे बतावत कहेउँ जइसे कि मई तोहका सान्ति दइ सकउँ। इ दुनिया तोहका कस्ट देत ह, सतावत ह, मुला हिम्मत रखा, मई दुनिया जीत लिहे अही।”

अपने चलन क बरे ईसू क पराथना

१७ १ इ सब बातन कहिके ईसू अकास कईती निहारेस अउर बोला, “हे परमपिता, उ घड़ी आइ पहुँची अहइ, अपने पूत क महिमा द्या ताकि तोहार पूत तोहार महिमा करि सकइ। २ तू ओका समूची मानव जाति प अधिकार दिहे अहा कि उ सबका हर एक मनई क जेका तू ओका दिहे अहा, अनन्त जीवन देइ। ३ अनन्त जीवन इ अहइ कि उ सबेन्ह तोहमें एक ही सच्चा परमेस्सर अउर ईसू मसीह, जेका तू भेजे अहा, जानि सकइ। ४ जउन काम तू मोका सौपे रह्या, ओनका पूरा कइके दुनिया मैं मई तोहका महिमावान करे अही। ५ इ बरे अब तू अपने साथ मोहूँ क महिमावान करा। हे परमपिता, उहइ महिमा मोका द्या जउन दुनिया स पहले तोहरे साथ मोका मिली रही।

६ “दुनिया स जउन मनइयन क तू मोका दिए अहा, मई ओनका तोहरे नाउँ क बोध कराएउँ। उ पचे लोगग तोहार रहेन, मुला तू ओनका मोका दिहा अउर उ सबेन्ह तोहरी आग्या क मानेन। ७ अब उ पचे जानत अहइ कि उ चीज जउन तू मोका दिए अहा, उ तू ही स पइदा होत ह। ८ मई

ओनका उहइ उपदेस दिए अही जउन तू मोका दिए रह्या अउर उ सबेन्ह ओका स्वीकार कइ लिहेन्ह। उ सबेन्ह अच्छी तरह बिसवास करत हीं कि तू मोका पठाए अहा।^१ मई ओनके बरे पराथना करत अही। मई दुनिया क बरे पराथना नाहीं करत अही, मई तउ ओनही क बरे पराथना करत अही, जेका तू मोका दिए अहइ, काहेकि उ सबइ तोहार अहइ।^{१०} सब चिज जउन कछू मोरी अहइ, उ तोहार अहइ, अउर जउन तोहार अहइ, उ मोर अहइ। अउर मई ओनही स महिमा पाए अही।

^{११} “मई अउर जियादा समइ तलक दुनिया मँ न रहब मुला उ पचे दुनिया मँ अहइ, अउर मई तोहरे पास आवत अही। हे पवित्र परमपिता अपने उ नाउँ क ताकत स ओनकइ रच्छा करा, जउन तू मोका दिए अहा ताकि मई अउर तू एक अही, वइसे ओनहू पचे एक होइ जाई।^{१२} जब मई ओनके साथ रहेउँ मई तोहरे नाउँ क ताकत स ओनकइ रच्छा कीन्ह, जउन तू मोका दिए रह्या। मई रच्छा कीन्ह अउर ओनके मँ स कउनो क नास नाहीं भवा, ओका छोड़के जउने क बिनास क पूत रहा, ताकि पवित्र सास्तर क बात सच होइ सकइ।

^{१३} “अब मई तोहरे लगे आवत अही, मुला इ सब बात मई दुनिया मँ रहि क कहत अही जइसे कि उ सबेन्ह अपने दिलन मँ मोर पूरा आनन्द पाइ सकइ।^{१४} मई तोहार बात ओनसे बताइ दिए अही, मुला दुनिया ओनसे नफरत करेस काहेकि उ पचे संसारिक नाहीं अहइ। वइसेन जइसेन कि मई दुनिया क न अही।

^{१५} “मई इ पराथना नाहीं करत अही कि तू ओनका दुनिया स निकार द्या, मुला इ बरे कि तू दुष्ट आत्मा स ओनकर रच्छा करा।^{१६} उ पचे दुनिया क न अही जइसे कि मई दुनिया क न अही।^{१७} सच्चाई क जरिए तू ओनका सबेन्ह अपने सेवा मँ लगाइ द्या। तोहार बचन सच्चा अहइ।^{१८} जइसेन तू मोका दुनिया मँ भेजे अहा, वइसेन मई ओनका इ दुनिया मँ भेजे अही।^{१९} मई ओनके बरे खुदइ क तोहरी सेवा मँ लगावत अही, जइसे कि ओनहू पचे सच्चाई क जरिए खुद क तोहरी सेवा मँ लगाइ सकइ।

^{२०} “मुला मई केवल ओनही क बरे पराथना नाहीं करत अही, मुला ओनके बरे पराथना करत अही जउन एनके उपदेस स मोरे मँ बिसवास करिहीं।^{२१} उ सबेन्ह एक होइ जाई। वइसे जइसे हे परमपिता तू मोरे मँ अहा अउर मई तोहरे मँ अही। उ पचे मोर सबके साथ एक होइ जाई। जइसे दुनिया बिसवास कर सकइ कि मोका तू भेजे अहा।

^{२२} महिमा जउन तू मोका दिए अहा, मई ओनका दिए अही, जइसे ओनहू पचे एक होइ सकइ, जइसे तू अउर मई एक अही।^{२३} मई ओनके मँ रही अउर तू मोरे मँ रहब्या, जइसे कि उ पचे पूरी तरह एक होइ जाई अउर इ दुनिया जान जाई कि मोका तू भेजे अहा अउर तू ओनका वइसेन परिम करे अहा जेनता तू मोसे परिम करत ह।

^{२४} “हे परमपिता, जेनका तू मोका सौपे अहा, मई चाहित ही कि मई रहउँ, उ पचे मोरे साथ ओनहू रहइ जइसे कि ओनहू पचे मोर उ महिमा देख सकइ जउन तू मोका दिहे अहा। इ दुनिया क रचना क पहलेन स तू मोका परिम करे अहा।^{२५} हे धार्मिक परमपिता, इ दुनिया तोहका नाहीं जानत मुला मई तोहका जानित ही अउर मोर चलन जानत हीं कि मोका तू भेजे अहा।^{२६} मई ओनका तोहरे नाउँ क अकेले जानकारी नाहीं दिए अही, मई इ बात क जानकारी देत रहब जइसे कि जउन परिम पू मोसे करत ह ओनहू स करा। अउर मई खुदइ ओनही मँ स एक रहउँ।”

ईसू क बन्दी बनावा जाब

(मती २६ : ४७-५६ ; मरकुस

१४ : ४३-५० ; लूका २२ : ४७-५३)

१८ इ कहिकि ईसू अपने चलन क साथ छोटी नदी किद्रोन क पास जहाँ एक बगीचा रहा, चला गवा।

^२ धोखे स ओका पकड़वावइवाला यहूदा उ जगह क जानत रहा, काहेकि ईसू जियादातर उहइ जगह प अपने चलन स मिलत रहा।^३ इ बरे यहूदा रोमी सिपाहिअन क एक टुकड़ी अउर मुख्य याजकन अउर परीसियन क पठाएस। मनइयन अउर मन्दिर क पहरेदारन क साथ लइके मसाल, दिया अउर हथिआर लइके, हुवाँ पहुँच गवा।

^४ फिन ईसू जउन सब कछू जानत रहा कि ओकरे साथ का होइ जात अहइ, आगे आवा अउर ओनसे कहेस, “तू पचे केका खोजत अहा ?”

^५ उ पचे ओका जवाब दिहेन, “ईसू नासरी क।” ईसू ओनसे कहेस, “उ तउ मई अही।” (उ धोखे स पकड़वावइला यहूदी हुवइँ ओनके साथ खड़ा रहा।)^६ जब उ कहेस, “उ मई अहउँ।” तउ उ सबेन्ह पाछे हटेन अउर भुइँया पड़ गिर पड़न।

^७ इ देखके ईसू फिन एक बार पूछेस, “तू सबेन्ह केका खोजन अहा ?”

उ बोलन, “ईसू नासरी क।”

^८ ईसू जवाब दिहेस, “मई तोहसे कहउँ, उ मई अहउँ। जदि तू मोका ढूँढत अहा तउ एनका सबेन्ह

क जाइ द्या ।”^१ अइसा ईसू इ बरे कहेस, जइसे कि ओकर कही बात सच होइ सकइ, “मई ओहमाँ स कउनो क नाही खोवा, जेका तू मोका सौपि रह्या ।”

^{१०} फिन समौन पतरस जेकरे हाथे मँ तरवार रही, आपन तरवार निकारेस अउर मुख्ययाजक क दास क दाहिना कान काटिके ओका घायल कइ दिहेस (उ दास क नाउँ मलखुस रहा) ^{११} फिन ईसू पतरस कहेस, “आपन तरवार मिआन मँ धइ ल्या । का मई यातना क कटोरा न पी लेई जउन परमपिता मोका दिहे अहइ ?”

ईसू क हन्ना क सामने लिआवा जाब

(मत्ती २६ :५७-५८ ; मरकुस

१४ :५३-५४ ; लूका २२ :५४)

^{१२} फिन रोमी टुकड़ी क सिपाहियन अउर ओनके सबेदारन, अउर यहूदियन क मन्दिर क पहरेदार सब मिलके ईसू क बन्दी बनाइ लिहेन्ह ।^{१३} अउर ओका बांधके पहिले हन्ना क पास लइ गएन, जउन कि उ बरिस क मुख्य याजक काइफा क ससुर रहा ।^{१४} इ काइफा उहइ मनई अहइ जउन यहूदी क सलाह दिहे रहा । कि लोगन क भलाई क बरे एक क मर जाब ठीक अहइ ।

पतरस क ईसू क पहिचाने स मना कइ देब

(मत्ती २६ :६९-७० ; मरकुस

१४ :६६-६८ ; लूका २२ :५५-५७)

^{१५} समौन पतरस अउर एक ठु चेलन ईसू क पीछे चल दिहेन्ह । मुख्य याजक इ चेलन क अच्छी तरह जानत रहा, इ बरे उ ईसू क साथ मुख्य याजक क अंगने मँ घुस गवा ।^{१६} मुला पतरस बाहेर क दरवाजा क लगे रूक गवा । फिन मुख्य याजक क जान पहचानवाला दूसर चेला बाहेर गवा अउर द्वारपालिन स कहिके पतरस क अन्दर लइ आवा ।^{१७} उ द्वारपालिन दासी पतरस स कहेस, “होइ सकत ह कि तूहँ ईसू क चेला होआ ?”

पतरस जवाब दिहेस, “नाहीं, नाही मई न अही !”

^{१८} काहेकि सर्दी बहुत जिआदा रही अउर मन्दिर क पहरेदार आग जलाइ के हुआँ खड़ा तापत रहेन । पतरस उ हुवाँ खड़ा तापत रहा ।

महायाजक क ईसू स पूछताछ

(मत्ती २६ :५९-६६ ; मरकुस

१४ :५५-६४ ; लूका २२ :६६-७१)

^{१९} फिन महायाजक ईसू स ओकरे चेलन अउर ओकरे उपदेस क बाबत पूछेस ।^{२०} ईसू ओका

जवाब दिहेस, “मई हमेसा सब मनइयन क खुलके बातचीत कीन्ह । मई हमेसा आराधनालय मँ अउर मन्दिर मँ जहाँ सब यहूदियन इकट्टा होतहीं, उपदेस दीन्ह । मई कबहूँ लुकाइ क छिपाइ क कउनो बात नाही कहेउँ ।^{२१} फिन तू मोसे काहे पूछत अहा ? मई का कहेउँ, ओनसे पूछा जे मोर बात सुने अहई । मई जउन कछू कहेउँ, उ सब जानत हीं ।”

^{२२} जब उ इ कहेस तउ मन्दिर क एक पहरेदार जउन हुवाँ खड़ा रहा, ईसू क झापड़ मारेस अउर बोलेस, “महायाजक क सामने जवाब देइ क इ तरीका नाही अहइ ?”

^{२३} ईसू ओका जवाब दिहेस, “जब मई कउनो झूठ कहे होउँ तउ तू ओका साबित करा अउर इ बतावा कि ओहमाँ कउनो बुराई रही अउर जब मई ठीक कहे अहउँ तउ तू काहे मारत अहा ?”

^{२४} फिन हन्ना ओका बंधे भए महायाजक काइफा क लगे भेज दिहेस ।

पतरस क ईसू क पहिचाने स मना करब

(मत्ती २६ :७१-७५ ; मरकुस

१४ :६९-७२ ; लूका २२ :५८-६२)

^{२५} जब समौन पतरस खड़ा होइके आगी तापत रहा तउ ओसे पूछा गवा, “का इ होइ सकत ह कि तू भी एकर चेला अहा ?”

उ तुरन्तइ मना कइ दिहेस अउर कहेस, “नाहीं मई नाही अही ।”

^{२६} महायाजक क एक ठु नउकर जउन ओकर रिस्तेदार रहा जेकर पतरस कान काटे रहा, कहेस, “बतावा, का मई तोहका ओकरे साथे बगिया मँ नाही देखे रहे ?”

^{२७} इ सुनिके पतरस एक दाई फिन इन्कार किहेस । अउर उहइ समइ मुर्गा बाँग दिहेस ।

ईसू क पिलातुस क समन्वा लइ जाब

(मत्ती २७ :१-२, ११-३१ ; मरकुस

१५ :१-२० ; लूका २३ :१-२५)

^{२८} फिन उ पचे ईसू क काइफा क घरे स रोम क राज्यपाल क महल मँ लइ गएन । ओह समइ सबेर होइ ग रहा । यहूदियन राज्यपाल क भवन मँ खुदइ नाही जावा चाहत रहेन, कहुँ उ पचे असुद्ध

§§न होइ जाई। अउर फिन फसह क भोज न खाइ पावई। २९ तउ पिलातुस ओनके पास बाहेर आवा अउर बोला, “एकरे ऊपर तू सबेन्ह कउन दोख लगावत अहा?”

३० जवाब मँ उ पचे ओसे कहेस, “जदि इ अपराधी न होत तउ हम एँका तोहका न सौँपित।”

३१ एकरे जवाब मँ पिलातुस ओनसे कहेस, “एँका तू लइ जा अउर अपने व्यवस्था क हिसाब स एकर निआव करा।”

यहूदियन ओसे कहेन, “हमका सबेन्ह क मउत क सजा देइ क कउनो अधिकार नाही अहइ।”

३२ अइसा इ बरे भवा, जइसे कि ईसू क उ बात सच्ची होइ जाइ जउन उ कहे रहा, कइसी मउत मिली।

३३ तब पिलातुस महल मँ वापस चला गवा। अउर ईसू क बोलाइ क ओसे पूछेस, “का तू यहूदियन क राजा अह्या?”

३४ ईसू जवाब दिहेस, “इ बात तू खुदइ कहत अहा या मोरे बावत दूसर लोग तोहसे कहेन?”

३५ पिलातुस जवाब दिहेस, “का तू सोचत अहा कि मई यहूदी अहउँ? तोहार लोग अउर मुख्य याजक तोहका मोरे हवाले करे अहइ। तू का किहे अहा?”

३६ ईसू जवाब दिहेस, “मोर राज्य इ दुनिया क नाही बाटइ। जदि मोर राज्य इ दुनिया क होत तउ मोर प्रजा मोका यहूदियन क सौँपा जाइ स बचावइ क बरे लड़ाई करत। मुला मोर राज्य हिआँ क नाही बाटइ।”

३७ अइसा सुनिके पिलातुस ओसे कहेस, “तू तउ राजा अह्या?”

ईसू जवाब दिहेस, “तू कहत अहा कि मई राजा अही। मई इ बरे दुनिया मँ पइदा भवा हउँ अउर आएँ अउर इहइ प्रयोजन स आएँ जइसे कि सच्चाई क साच्छी दइ सकउँ। जउन मनई सच्चाई क तरफदारी करत ह उ मोरी बात सुनत ह।”

३८ पिलातुस ओसे पूछेस, “सच्चाई का अहइ?” अइसा कहिके फिन उ यहूदी क पास बाहेर गवा अउर ओनसे बोला, “मई ओकरे मँ कउनो दोख नाही पाएँ।” ३९ अउ तोहार सबन्क रिवाज अहइ कि फसह क त्यौहार प तोहरे सबके बरे एक मनई क छोड़ देइ। तउ का तू पचे चाहत अहा कि इ यहूदी क राजा क तोहरे बरे छोड़ देई?”

४० एक दाई फिन उ पचे चिल्लाएन, “एँका नाही, मुला बरअब्बा (एक ठु बागी रहा।) क छोड़ या!”

१९ तब पिलातुस ईसू क पकड़वाइके कोड़ा लगावाएस। २ फिन सिपाहियन काँटिदार टहनी क मोड़के मुकुट बनाएन अउर ओकरे मूँडे प रख दिहेन। अउर ओका बैजनी रंग क कपड़ा पहिराएन। ३ अउर ओकरे पास आइ आइ क कहइ लागेन, “यहूदियन क राजा जिअत रह!” अउर ओका झापड़ मारइ लागेन।

४ पिलातुस एक बार फिन बाहेर आवा अउर ओनसे कहेस, “देख! मई तोहरे पास ओका फिन बाहर लियावत अही जइसे कि तू जान सका कि मई ओहमाँ कउनो खोट नाही पावा।” ५ फिन ईसू बाहेर आवा। उ काँटिन क मुकुट अउर बैजनी रंग क चोगा पहिरे रहा। तब पिलातुस कहेस, “इहइ अहइ उ मनई!”

६ जब उ पचे ओका देखेन तउ मुख्य याजकन अउर मन्दिर क पहरेदारन चिल्लाई क कहेन, “एँका क्रूस पर चढ़ाइ या! एँका क्रूस प चढ़ाइ या!”

पिलातुस ओनसे कहेस, “तू एँका लइ जा अउर क्रूस प चढ़ाइ या, मई एहमाँ कउनो खोट नाही पाएँ?”

७ यहूदियन जवाब दिहेन, “हमार व्यवस्था कहत हे कि एँका मरइ क पड़ी काहेकि अपने क परमेस्सर क पूत होइ क दावा किहे अहइ।”

८ अब जब पिलातुस ओका इ कहत सुनेस तउ बहुत डेराइ गवा। ९ अउर फिन राज्यपाल क महल क अन्दर जाइके ईसू स कहेस, “तू कहाँ स आइ अहा?” मुला ईसू कउनो जवाब नाही दिहेस। १० फिन पिलातुस ओसे कहेस, “का तू हमसे बात नाही करइ चाहत अहा? का तोहका पता नाही अहइ किइ मोरे अधिकार मँ अहइ कि तोहका मई छोड़ देउँ अउर तोहका क्रूस प चढ़ावइ क अधिकार मोका मिला अहइ।”

११ ईसू ओका जवाब दिहेस, “तोहार मोरे ऊपर अधिकार तब तक नाही होइ सकत जब तलक परमेस्सर तोहका उ अधिकार नाही देत। इ बरे जउन मनइ तोहका मोरे हवाले किहे अहइ, उ तोहसे भी बड़ा पापी अहइ।”

१२ इ सनिके पिलातुस ओका छोड़इ क कउनो उपाय सोचइ लाग। मुला यहूदियन चिल्लाएन लागेन, “जदि तू एँका छोड़ देब्या तउ तू कैसर क

§§१८:२८ असुद्ध यहूदियन इ मानत रहेन कि कउनो गैर यहूदियन क घरे मँ जाइ स ओनकर फर्छइ घटि जात ह। (यूहन्ना ११:५५)

दोस्त न अह्या कउनो मनई जउन खुदइ क राजा कइ उ कैसर क विरोधी अहइ।”

१३ जब पिलातुस इ सब्दन क सुनेस तउ उ ईसू क बाहेर उ जगह लइ गवा जउने क “पाथर क चउतरा।” कहा जात रहा। (इब्रानी भाखा में एँका गब्वाता कहा गवा ह।) अउर हुवाँ निआव क आसन प बइठ गवा। १४ इ दिन फसह क त्यौहार क तैयारी क दिन रहा। दुपहरिया होइवाली रही। पिलातुस यहूदियन स कहेस, “इ रहा तोहार राजा।”

१५ उ सबेन्ह चिल्लाएन, “एँका लइ जा! एँका लइ जा! एँका क्रूस प चढ़ाय द्या।”

पिलातुस ओनसे कहेस, “का तू पचे चाहत अहा कि तोहरे राजा क मई क्रूस प चढ़ाउँ?”

इ सुनिके मुख्ययाजकन जवाब दिहेन, “कैसर क छोड़के हमार कउनो दूसर राजा नाही अहइ।”

१६ फिन पिलातुस ओका क्रूस प चढ़ाइ क बरे ओनका सौंपि दिहस।

ईसू क क्रूस प चढ़ावा जाव

(मत्ती २७:३२-४४; मरकुस

१५:२१-३२; लूका २३:२६-३९)

इ तरीके स ईसू क हिरासत में लइ लीन्ह गवा।

१७ आपन क्रूस उठाइके उ अइसी जगह प गवा जेका “खोपड़ी क जगह कहा जात ह।” (इब्रानी भाखा में एँका “गुलगुता” कहा जात ह।) १८ हुवाँ स उ सबेन्ह ओका दुइ जने क साथे क्रूस प चढ़ाइ दिहेन। एक इ तरफ, दूसर दूसरी तरफ अउर बीज में ईसू रहा।

१९ पिलातुस दोखपत्र क्रूस प लगाइ दिहस। जेहमाँ लिखा रहा, “ईसू नासरी, यहूदी क राजा।” २० तमाम यहूदियन उ दोखपत्र क पढ़ेन्ह, काहेकि जहाँ ईसू क क्रूस प चढ़ावा ग रहा, उ जगह सहर क लगे रही। अउर उ ऐलान इब्रानी, यूनानी अउर लातीनी भाखा में लिखा रहा।

२१ तब मुख्य यहूदी याजकन पिलातुस स कहेन, “यहूदी क राजा” न लिखा। मुला इ लिखा, “इ मनई कहे रहा यहूदी क राजा मई अहउँ।”

२२ पिलातुस जवाब दिहेस, “मई जउन कछू लिख दीन्ह, तउ लिख दीन्ह।”

२३ जब सिपाही ईसू क क्रूस प चढ़ाइ चुकेन तउ उ सबेन्ह ओकर कपरा लिहेन, अउर ओका चार टुकड़ा में बाँट दिहेन। ओकर एक-एक टुकड़ा

एक-एक सिपाही लइ लिहेस। उ पचे कुरतउ उतरवाइ लिहेन। इ बरे कि उ कुरता ऊपर स नीचे तक बुना रहा, ओकर सिलाई नाही भइ रही। २४ इ बरे उ पचे आपस में कहेन, “एँका न फाड़ा जाइ, एँका कउन पावइ, एकरे बरे परची डाली जाइ।” जइसे कि पवित्र सास्तर क इ बात पूरी होइ जाइ, “उ पचे मोर कपरा आपस में बाँट लिहेन अउर मोरे अंगिया क बरे परची डाएन।” † इ बरे सिपाहियन वइसेन करेन।

२५ ईसू क क्रूस क लगे ओकर महतारी, मउसी क्लोपास क पत्नी मरियम, अउर मरियम मगदलीनी ठाढ़ रहिन। २६ ईसू जब अपनी महतारी अउर अपने पियारा चेला क पास खड़ा लखेस तउ अपनी महतारी स कहेस, “पिआरी अम्माँ, इ रहा तोहार बेटवा।” २७ फिन उ अपने चेला स कहेस, “इ अहइ तोहार महतारी।” अउर फिन उहइ समइ उ चेला ओका अपने घरे लइ गवा।

ईसू क मउत

(मत्ती २७:४५-५६; मरकुस

१५:३३-४१; लूका २३:४४-४९)

२५ एँकरे बाद ईसू जान लिहेस कि सब कछू पूरा होइ चुका अहइ। फिन इ बरे कि पवित्र सास्तर क बात सही उतरइ, उ कहेस, “मई पियासा अहउँ।” २६ हुवाँ सिरका स भरा एक ठु बासन धरा रहा। इ बरे उ सबेन्ह एक स्पंज क सिरका में पूरी तरह डुबोइके हिसप (कंटिजर क पेड़) क टहनी प रखेन अउर ऊपर उठाइ क ओकरे मुँह स लगाएन। २७ फिन जब ईसू सिरका लइ लिहेस तउ उ बोलेस, “पूरा होइ गवा।” तउ उ आपन सिर झुकाइ दिहेस अउर परान छोड़ दिहेस।

२८ अगला दिन फसह क तैयारी क दिन रहा। सबित क दिन ओनकइ लास क्रूस प न लटका रहइ कोहेकि सबित क दिन बहुत महत्व क दिन होत ह एँकरे बरे यहूदियन पिलातुस स कहेन कि उ आज्ञा देइ कि ओकर टांग तोड़ दीन्ह जाइ अउर ओकर लास हुवाँ स हटाइ दीन्ह जाइ। २९ तउ सिपाही आएन अउर सबसे पहले एक मनई क अउर फिन दूसरे क जउने क साथे साथे क्रूस प चढ़ावा ग रहा, टाँग तोड़ डाएन। ३० मुला जब उ ईसू क लगे आएन, तउ लखेन कि उ तउ पहिलेन मर चुका अहइ। इ बरे ओकर टाँग नाही तोड़ें।

*१९:१४ तैयारी क दिन सुक्करवार जब यहूदी फसह क तैयारी करत रहेन।

†१९:२४ उद्धृत भजन संहिता २२:१८

३४ मुला ओहमाँ स एक सिपाही ईसू क पंचरे मँ आपन भाला भोंक दिहेस, जउने मँ स तुरन्त लहू अउर पानी निकरइ लाग। ३५ (जउन एका देखे रहा उ साच्छी दिहेस अउर ओकर साच्छी सच्ची अहइ, उ जानत ह कि उ सच्ची बात कहत अहइ ताकि तू सबेन्ह बिसवास करा।) ३६ इ एह बरे भवा कि पवित्तर सास्तर क बात पूरी होइ सकइ, “ओकर कउनो हडडी तोड़ी न जाई” ३७ अउर पवित्तर सास्तर मँ लिखा अहइ कि, “जे ओकरे भाला भोंकेस उ पचे ओकरी तरफ तकहीं।”

ईसू क आखिरी किरिया करम

(मत्ती २७ : ५७-६१ ; मरकुस

१५ : ४२-४७ ; लूका २३ : ५०-५६)

३५ एँकरे बाद अरमतियाह क यूसुफ (जउन ईसू क चेला रहा, मुला यहूदियन क डर क मारे खूद क छिपाए रहत रहा।) पिलातुस स पराथना करेस कि ओका ईसू क ल्हास लइ जाइ क इजाजत दइ देइ। इ बरे उ ओकर ल्हास लइ गवा।

३६ निकुदेमुस, जउन ईसू क लगे रात क पहले आइ रहा, हुवाँ लगभग तीस किलो मिला जुला गंधरस अउर एलवा (जइसे कि ल्हास मँ सड़न न आवइ पावइ) लइके आवा। फिन उ पचे ईसू क ल्हासे क लइ गएन। ३७ अउर यहूदियन क ल्हास गाइइ क व्यवस्था क अनुसार ओका महकइवाली तमाम चीज क साथ कफन मँ लपेट दिहेन। ३८ जहाँ प ईसू क कर्ूस प चढ़ावा ग रहा, हुवाँ एक ठु बगीचा रहा। अउर उ बगीचा मँ एक ठु नई कबर रही जउने मँ अब तक केँ क नाहीं रखा ग रहा। ३९ उ दिन सबित क तैयारी क दिन सुक्रवार रहा, अउर उ कबर बहोतई लगे रही, इ बरे उ सबेन्ह ईसू क उहइ मँ रख दिहेन।

ईसू क कबर खाली

(मत्ती २८ : १-१० ; मरकुस

१६ : १-८ ; लूका २४ : १-१२)

२० सप्ताह क पहिले दिन धुर सबेरे जब थोरि क अँधेरा बचा रहा तउ मरियन मगदलीनी कबर प आइ। अउर उ देखेस कि कबर क पाथर हटा अहइ। २ फिन उ दौड़के समौन पतरस अउर ईसू क पियारा चलन क लगे पहुँची। अउर ओनसे बोली, “उ पचे पभू क कबर स निकालके लइ गएन। अउर हमका पचे इ पता नाहीं अहइ कि उ सबेन्ह ओका कहाँ रखेस अहइ।”

३ फिन पतरस अउर उ दूसर चेला हुवाँ स कबर क तरफ चल पड़ेन्ह। ४ उ दुइनउँ साथे साथे दउड़त

रहेन मुला दूसर चेला पतरस स आगे चला गवा अउर कबर प पहिले पहुँच गवा। ५ उ नीचे निहुरिके देखेस कि हुवाँ कबर क कपरा परा अहइ, मुला उ भीतर नाहीं गवा।

६ उहइ समइ समौन पतरस जउन ओकरे पाछे आवत रहा, उहउ आइ पहुँचा अउर कबर क अन्दर चला गवा। उ देखेस कि हुवाँ कफन क कपरन परा अहइ। ७ अउर उ कपरा जउन गाइत क समइ ओकरे मुड़े कइती रहा, उ कफन क साथ नाहीं अहइ, उ अलग स दूसरी जगह प रखा रहा। ८ फिन दूसर चेला जउन कबर प पहिले पहुँचा रहा, उहउ भीतर घुसा। उ देखेस अउर बिसवास करेस। ९ (उ पचे अबहुँ तलक पवित्तर सास्तर क इ बचन नाहीं समझे रहेन कि ओका मरा मनइयन स जी उठव एकदम पक्का अहइ।)

मरियम मगदलीनी क ईसू दर्सन दिहेस

(मरकुस १६ : १-११)

१० फिन उ दुइनउँ चलन अपने अपने घरे चला गएन। ११ मरियम रोवत चिल्लात कबर क बाहेर खड़ी रहि गइ। रोवत चिल्लात उ कबर मँ अन्दर झाँकि क बरे नीचे झुकी। १२ जउने जगह ईसू क ल्हास रखी रही, हुवाँ उ सफेद कपरा पहिरे दुइ ठु सरगदूत बइठा रहेन, ओहमाँ स एक ठु सिरहाने प बइठा रहा अउर दूसर पइताने प बइठा रहा।

१३ उ पचे ओसे पूछेन, “ऐ स्त्री तू काहे क रोअति अहा ?”

उ जवाब दिहेस, “उ पचे मोरे पभू क उठाइ लइ गवा अहइ अउर मोका इ पता नाहीं बाटइ कि ओका कहाँ रखे अहइ ?” १४ एँतना कहिके उ मुड़ी अउर देखेस कि ईसू खड़ा अहइ। मुला उ जानि नाहीं पाएस कि उ ईसू रहा।

१५ ईसू ओसे कहेस, “ऐ स्त्री तू काहे रोवति अहा ? तू केका खोजति अहा ?”

उ इ जानेस कि पूछइवाला माली अहइ, उ ओसे कहेस, “महासय, जदि तू कबहुँ ओका उठाए होया तउ मोका बतावा कि तू ओका कहाँ रखे अहा ? मई ओका लइ जावइ।”

१६ ईसू ओसे कहेस, “मरियम।”

उ पाछे मुड़ी अउर इब्रानी मँ कहेस, “रब्बूनी” मतलब “गुरू।”

१७ ईसू ओसे कहेस, “मोका जिन छुआ काहेकि मई अबहिँ तलक परमपिता क पास ऊपर नाहीं पहुँचा अही। तू मोरे भाइयन क लगे जाइके बतावा, मई अपने परमपिता अउर तोहरे

परमपिता तथा अपने परमेस्वर अउर तोहरे परमेस्वर क पास ऊपर जात अही।”

१८ मरियन मगदलीनी आइके चलन क समन्वा बताएस, “मई पर्भू क देखेउँ!” अउर उ मोका इ बात बताएस।

चेलन क दर्सन देब

(मत्ती २८ :१६-२० ; मरकुस

१६ :१४-१८ ; लूका २४ :३६-४९)

१९ उहइ दिन सझा क, उ हफता क पहिला दिन रहा ओकर चलन यहूदियन क डरके मारे आपन दरवाजा बन्द करे रहेन। उहइ समइ प ईसू आइके ओनके बीच मँ खड़ा होइ गवा अउर ओनसे कहेस, “तोहका सबका सान्ति मिलइ।” २० एतना कहिके उ ओनका सबेन्ह क आपन हाथ अउर आपन बगल देखाँएस। सब चलन अपने पर्भू क देखके बहुत आनन्द मँ आइ गएन।

२१ तउ ईसू ओनसे फिन कहेस, “तोहका सबका सान्ति मिलइ। वइसेन जइसेन परमपिता मोका भेजेस, मई तू पचे क भेजत अही।” २२ इ कहिके उ ओनके सबके ऊपर फूँक मारेस अउर ओनसे कहेस, “पवित्तर आतिमा क अपनाइ ल्या।” २३ जउने मनई क पाप क तू छमा करत ह, ओनका छमा मिलत ह अउर जउन मनई क पापन क तू छमा नाही करत्या, उ सब बिना छमा पाए रहत ही।”

ईसू थोमा क दर्सन दिहेस

२४ थोमा जउन बारह मँ एक रहा अउर दिदिमस कहवावा जात रहा, जब ईसू आवा रहा तउ ओकरे साथे नाही रहा। २५ दूसर चलन ओसे कहत रहेन, “हम पर्भू क देखे अही।” मुला उ ओनसे कहेस, “जब उ तलक मई ओकरे हाथन मँ कील क निसानी न देख लेब अउर ओहमाँ आपन अंगुरी न डाइ लेब, तथा ओकरे पंजरे मँ आपन हाथ न डाइ लेब तब तक मई बिसवास न करब।”

२६ आठ दिन क बाद ओकर चलन फिन एक दाई घरे क भीतर रहेन। अउर थोमा ओनके साथे रहा। दरवाजा प ताला लगा, रहा, मुला ईसू आवा अउर ओनके बीच मँ खड़ा होइके बोला, “तोहका सबन क सान्ति मिलइ।” २७ फिन उ थोमा स कहेस, “हाँ आपन अंगुरी अब अउर मोर हाथ देख, आपन हाथ फैलाइके मोरे पंजरे मँ डावा। सन्देह करब छोड़ द्या अउर बिसवास करा।”

२८ एकर जवाब देत थोमा बोला, “मोर पर्भू, हे मोर परमेस्वर!”

२९ ईसू थोमा स कहेस, “तू मोका देखिके बिसवास करे अहा। मुला उ पचे धन्य अहई जउन बिना देखे बिसवास करत ही।”

इ किताब यूहन्ना काहे लिखेस

३० ईसू अउर तमाम चमत्कार चिन्ह अपने चलन क देखाएस जउन इ किताब मँ नाही लिखी अहई। ३१ अउर जउन बात हिआँ लिखी अहई। उ इ बरे लिखी अहई कि तू बिसवास करा कि ईसू ही परमेस्वर क पूत मसीह अहइ। अउर इही बरे कि बिसवास करत ओकरे नाउँ स तोहका सबन क अनन्त जीवन मिलइ।

ईसू झील प परगट भवा

२१ एकरे बाद झील तिबिरियास प ईसू अपने चलन क समन्वा फिन खुदइ क परगट किहस। उ खुदइ क इ तरीके परगट किहस। २ समौन पतरस, थोमा (जउन जुडौधा कहवावा जात रहा) गलील क काना क नतनएल, जब्दी क बेटवन अउर ईसू क दुइ टू चेलन हुवाँ इकट्टा रहेन। ३ समौन पतरस ओनसे कहेस, “मई मछुरी पकड़इ जात अही।”

उ पचे ओसे बोलेन, “हमहूँ पचे तोहरे साथे चलत अही।” उ सबेन्ह ओकरे साथे चल दिहेन अउर नाउ प बइठ गएन। मुला उ रात उ पचे कछू नाही पकड़ पाएन।

४ मुला तब तलक सबेर होइ गवा रहा। मुला चेलन क पता नाही चल पावा कि हुवाँ ईसू अहइ। ५ फिन ईसू ओनसे कहेस, “लड़को, तोहरे लगे कउनो मछुरी अहइ?”

उ पचे जवाब दिहेन, “नाही।”

६ फिन उ कहेस, “नइया क दहिनी तरफ जाल फेंका तउ तोहका कछू मिली।” तउ उ पचे जाल फेंकिन मुला एतना जियादा मछुरी रहिन कि फिन जाल क वापस नाही खींच पाएन।

७ फिन ईसू क पियारा चेला पतरस स कहेस, “इ तउ पर्भू अहइ।” जब समौन इ सुनेस कि पर्भू अहइ तउ उ आपन बाहरे पहिनइवाला कपरा कस लिहेस (काहेकि उ नंगा रहा।) अउर पानी मँ कूद पड़ा। ८ मुला दूसर चलन मछुरिअन स भरा जाल खींचत भए नाउ स किनारे आएन (काहेकि उ धरती स जियादा दूर नाही रहेन, ओनकाइ दूरी करीब सौ मीटर क रही।) ९ जब उ पचे किनारे आएन तउ हुवाँ जरत कोयलन क आग देखेन। ओकरे ऊपर मछुरी अउर रोटी पकावइ क बरे रखी रही। १० ईसू ओसे

कहेस, “तू पचे जउन मछरी पकरे अहा, ओहमाँ स कछू लइ आवा।”

११ फिन समौन पतरस नाउ प गवा अउर एक सौ तिरपन बड़ी मछरिअन स भरा जाल किनारे प खींच लिहेस। जाल मँ एँतनी अधिक मछरी रहिन मुला जाल फटा नाही। १२ ईसू ओनसे कहेस, “हियाँ आवा अउर खाना खा!” ओकरे चेलन मँ स कउनो क हिम्मत नाही परी कि ओसे पूछ सकई कि “तू कउन मनई अह्या?” काहेकि उ जान ग रहेन कि उ पर्भू अहीं। १३ ईसू आगे गवा। उ रोटी लिहेस अउर ओनका दइ दिहेस अउर इहइ तरह स मछरियन क दइ दिहेस।

१४ अब इ तीसरी बार रहा जब कि मरे क बाद जी उठिके उ आपने चेलन क समन्वा परगट भवा।

ईसू क पतरस स बाचीत

१५ जबहि उ पचे भोजन कइ चुकेन तउ ईसू समौन पतरस स कहेस, “यूहन्ना क पूत समौन, जेतना पिरेम इ सबइ मोसे करत हीं, तू मोसे जियादा पिरेम करत अहा?”

पतरस ईसू स कहेस, “हाँ पर्भू, तू जानत अहा कि मई तोहसे पिरेम करत हऊँ।”

ईसू पतरस स कहेस, “मोरे मेमनन क रखवाली करा।”

१६ उ ओसे दुसरी बार बोला, “यूहन्ना क बेटवा समौन, का तू मोसे पिरेम करत ह?”

पतरस ईसू स कहेस, “हाँ पर्भू, तू जानत अहा कि मई तोहसे पिरेम करित ह।”

ईसू पतरस स कहेस, “मोरी भेड़न क देखभाल कर।”

१७ ईसू फिन तीसरी दाई पतरस स कहेस, “यूहन्ना क बेटवा समौन, का तू हमसे पिरेम करत ह?”

पतरस दुखी होइ गवा कि ईसू ओसे तीसरी दाई पूछेस, “का तू मोसे पिरेम करत ह?” इ बरे पतरस

ईसू स कहेस, “पर्भू तू सब कछू जानत ह, तू जानत अहा कि मई तोहसे पिरेम करित ह!”

ईसू ओसे कहेस, “मोरी भेड़न क चरावा। १८ मई तोहसे सत्य कहत अहउँ, जब तू जवान रह्या, तउ तू अपनी कमर प फेटा कस क जहाँ चाहत रह्या, चला जात रह्या। मुला जब तू बुढ़ाइ जाब्या, तउ हाथ पसरब्या अउर कउनो दूसर तोहका बांधके जहाँ तू नाही जाइ चाहब्या, हुवाँ लइ जाई।” १९ (उ इ दरसावइ क बरे अइसा कहेस कि उ कउनो तरह क मतउत स परमेस्वर क महिमा करी।) एँतना कहिके उ ओसे कहेस, “मोरे पाछे चला आवा।”

२० पतरस पाछे मुड़ा अउर देखेस कि उ चेलन जेहसे ईसू पिरेम करत रहा, ओनके पाछे आवत अहइ। (इ उहइ रहा जउन भोजन करत ओकरी छाती प झुकके पूछे रहा, “पर्भू, उ कउन अहइ, जउन तोहका धोखे स पकड़वाई?”) २१ जब पतरस ओका देखेस तउ उ ईसू स बोला, “पर्भू, एकर का होई?”

२२ ईसू ओसे कहेस, “जदि मई इ चाही कि जब तलक मई आई, इ हिआँ रहइ, तउ तोहसे का मतलब? तू मोरे पाछे चला आवा।”

२३ इ तरह स इ बात भाइयन (मनवइयन) मँ हिआँ तलक फइल गइ कि उ चेला जेका ईसू पियार करत ह न मरी। ईसू इ नाही कहे रहा कि उ न मरी, बल्कि उ तउ एँतना कहे रहा, “जदि मई चाही कि जब तलक मई आई, इ हिआँ रहइ तउ तोहसे का मतलब?”

२४ इहइ उ चेला अहइ जउन एकइ सबके साच्छी देत ह कि जउन इ सब बात लिखे अहई सब सही अहई।

२५ ईसू इहइ तरीके बहुत काम करेस। जदि एक एक कइके ओन सबका लिखा जात तउ मई सोचित ह कि जउन किताब लिखी जातिन, उ एँतना जियादा होतिन कि पूरी धरती प न अमातिन।